

हिब्रूगदेदा भिबा चिठी

चु चिठीला बारेरी पाङ्तोःमा

भिबा म्हि: खालैदा था आरे। डाच्छा डाच्छा चु चिठी पावलसे भिबा हिन्ना भिसी बाइबल विद्वानगदेसे पाङ्मुबा। तर दान्दे पावलसे भिबा आहिन भिसी बाइबल विद्वानगदेसे म्हन्मुला। थेनीगदे न्हडला कोइसे अपोल्लोससे, कोइसे बारनाबाससे, कोइसे लूकासे, कोइसे सिलाससे, कोइसे चा स्थहान्दो म्हिसे भिबा हिन्ना भिसी म्हन्बा मुला। तर खाल्से भिजी भिबा ताम परमेश्वरदा बाहेक स्थहान्दो खालैदान था आरे।

भिबा ग्ला: पक्का था आरे, तर कोइ कोइ बाइबल विद्वानगदेसे रोम शहरग्याम तखम्ला भिसी पाङ्बा मुला।

भिबा साल: ओस्पन ईश्वी संवत् ७० (विक्रम संवत् १२७) साल भन्दा डाच्छा भिबा मुबा।

खाल्दा भिबा: येशूदा विश्वास लबा यहूदी म्हिगदेला समूहगदेदा भिबा मुबा।

येशूदा विश्वास लबा यहूदी म्हिगदेसे ल्हानान दुखदेन बिरोधला ताम नातोःबासे लमा येशूदा विश्वास लबा खलाला वा भिसी लोङ्बा मुबा। थेतबासेलमा चु चिठी भिबा म्हिसे थेनीगदेदा आँट पिन्बाला लागिरी येशू ख्रीष्टनोन परमेश्वरला म्हाङ्बा रुप हिन्ना भिसी पाङ्बा मुला। चु ताम घोना लबाला लागिरी चु चिठी भिबा म्हिसे गोर सोम सत्य तामग्याम चुहङ् भिसी पाङ्बा मुला।

(क) येशू परमेश्वरला जुकजुकधोनाला भा हिन्ना, थेसे जम्मान दुख नासी परमेश्वर आबासे कुल्बा जम्मान तामगदे सेमहेन्सेन खाहङ्

लसी ड्यान्तोःला भिसी था याङ्जी। येशू परमेश्वरला भा तबासे लमान डाच्छाला कबुलरी पाङ्बा जम्मान अगमवक्तागदे, स्वर्गदूतदेन मोशा भन्दा घेन हिन्ना।

(ख) परमेश्वरला भा येशू ख्रीष्ट चा जुकजुकधोना परमेश्वरला मन्दिररी पूजा लबा मुल म्हि हिन्ना। थे चा डाच्छाला कबुलरी पाङ्बा परमेश्वरला मन्दिररी पूजा लबा म्हि भन्दा घेन हिन्ना भिसी पाङ्बा मुला।

(ग) येशू ख्रीष्टदा विश्वास लबा म्हिदा पापदेन लोङ्बा खबा ताम ओच्छे कालग्याम जोगब लला। चु तामला चिनु यहूदी धर्मला रिमठिमदेन जन्तुगदेदा बलि पिन्बा तामगदेग्याम डाच्छान उन्सी जिन्बा मुबा।

चु चिठी भिबा म्हिसे ११ अध्यायरी चु चिठी पढब लबा म्हिगदेदा इस्राएली काइरनरी मिन भिसी थान्बा कोइ कोइ मिन चलब तबा म्हिगदेसे लबा विश्वासला बारेरी पाङ्सी विश्वासरी सदन कोङ्सी चिउ भिसी बिन्ती लबा मुला। १२ अध्यायरी जस्तोन दुख तसैनोन आसितेधोना येशूदा जे च्यासी जम्मान ताम नागो, ओच्छे विश्वासरी कोङ्सी चिउ भिसी थेसे थेनीगदेदा पाङ्बा मुला। चु चिठी चा सल्लाह पिन्बादेन होशियार तना लबा तामगदे भिबान थुम्ना लबा मुला।

मुल तामगदे

- येशू ख्रीष्ट परमेश्वरला पक्का रुप हिन्ना १:१-३
- स्वर्गदूतगदे भन्दा येशू ख्रीष्ट घेन हिन्ना १:४-२:१८
- मोशादेन यहोशू भन्दा येशू ख्रीष्ट घेन हिन्ना ३:१-४:१३
- येशू ख्रीष्ट परमेश्वरला मन्दिररी पूजा लबा जम्मान भन्दा घेन म्हि ४:१४-७:२८
- येशू ख्रीष्टसे लबा घेन कबुल ८:१-९:२८
- येशू ख्रीष्ट पापला सय फाबारी कुसरी सिबा १०:१-३०
- विश्वास चा जम्मान भन्दा मुल ताम हिन्ना ११:१-१२:२६
- परमेश्वरदा ताङ्ना लतोःबा १३:१-१६
- चिठीला थुमरी लबा प्रार्थना १३:२०-२१
- चिठीला थुमरी पाङ्बा ताम १३:२२-२५

हिब्रूगदेदा भिबा चिठी

येशू ख्रीष्ट परमेश्वरला भा

१ ओन्मा परमेश्वर अगमवक्ता-
गदेग्याम यहाडला आखे
म्हेमेगदेदेन छ्याम ल्हानान थरीसे
ल्हानान रेमधोना ताम लमुबा। २तर
चु लिच्छाला धिनगदेरी परमेश्वर
हाडला भाग्याम यहाडदेन छ्याम
ताम लमुला। परमेश्वरसे हाडला भा
ख्रीष्टग्यामसेन जम्बुलिङ स्होजी।
ओच्छे जम्मान स्हेगदे हाडलान
स्होबारी थेदान धम्जी। ३परमेश्वरला
घेन यहालदेन शक्ति ख्रीष्टग्याम म्राड्बा
मुला। परमेश्वरला रुप थेनोन हिन्ना।
थेला शक्तिशाली बचनग्यामसेन मुदेन
जम्बुलिङला जम्मान स्हेगदे छ्याबा
मुला। ओच्छे म्हिदा पापग्याम थार्ना
लबा गे लसी जिन्माहेन्से थे स्वर्गरी
शक्तिशाली परमेश्वरला दाहिने
छ्यापट्टि मुल ठिरी धन्छ्याबा मुला।

ख्रीष्ट स्वर्गदूतगदे भन्दा घेन हिन्ना

४ ख्रीष्ट स्वर्गदूतगदे भन्दा ल्हानान
घेन हिन्ना, थेहङ् लसीन परमेश्वरसे

स्वर्गदूतगदेला भन्दा थेला मिन ज्यबा
थान्जी।

५ तिग्दा भिसम परमेश्वरसे येशूदा
बाहेक खाइमै खजिबै स्वर्गदूतगदेदा
चुहङ् भिसी सुङ्बा आरे,

“ए डाला भा हिन्ना,
तिनी डा एला आबा दोबा मुला”
ओच्छे

“डा थेला आबा दोला,
थे डाला भा दोला।”*

६ परमेश्वरसे हाडला भादा
जम्बुलिङरी पुइखबा धुइरी

“जम्मान स्वर्गदूतगदेसे थेदा तेनौ”
भिसी दोःसीनोन सुङ्बा मुला।

७ परमेश्वरसे स्वर्गदूतगदेला बारेरी
चुहङ् भिसी सुङ्बा मुला,

“परमेश्वरसे हाडला
स्वर्गदूतगदेदा लाबा स्होजी,
ओच्छे हाडला गे लबा म्हिगदेदा
चा मेला ल्हाम स्होजी।”*

८ तर परमेश्वरसे हाडला भाला बारेरी
चुहङ् भिसी सुङ्बा मुला,

“परमेश्वर हाडला यहल्सा सदन
चिला।

ओच्छे हाडसे ठीक लसी शासन
लला।*

६ हाडदा ठीक ताम सेम निमुला,
ओच्छे आज्यबा ताम चा
च्यागेन आम्हन्मुला।
थेतबासेलमा परमेश्वर, हाडला
परमेश्वरसे हाडदा धम्बा
मुला।

ओच्छे हाडला होगदेदा भन्दा
ल्हाना मान लसी ताड्ना
लबा मुला।”*

१० परमेश्वरसे हाडला भादा दोःसी
चुहड् भिसी सुड्जी,
“प्रभु, हाडसेन शुरुरी जम्बुलिडला
जग थान्जी।

ओच्छे हाडसे हाडलान छयासे
मुदेन मुरी मुबा जम्मान स्हेगदे
स्होजी।*

११ थे जम्मान स्हेगदे नाश तला, तर
हाड चा सदन चिला।
थे स्हेगदे क्वान हड् भोक्टो तसी
निला।*

१२ थे स्हेगदेदा हाडसे क्वान हड्
लसी रिल्ला,
ओच्छे थे स्हेगदे क्वान हड्बा
भोक्टो तसी निला ओच्छे
पोला,
तर हाड चा खाइमै आपो।
ओच्छे हाड खाइमै म्हासी
आनि।”

१३ तर परमेश्वरसे येशूदा बाहेक
खाइमै खजिबै स्वर्गदूतगदेदा चुहड्
भिसी सुड्बा आरे,

“डाइ एला शत्रुगदेदा एला काड
धिरी आथान्तेधोना
ए डाला दाहिने यापट्टि मुल ठिरी
चिउ।”*

१४ थेतबासेलमा स्वर्गदूतगदे चा
परमेश्वरदा तेन्बा आत्मा जे हिन्ना।
ओच्छे थार्बा याड्बा म्हिगदेदा हो
लबाला लागिरी परमेश्वरसे थेनीगदेदा
पुड्खबा हिन्ना।

परमेश्वरसे येशू ख्रीष्टग्याम पिन्बा
थार्बादा थाम्लेःगो

२ थेतबासेलमा यहाडसे जुन
ताम थेःबा मुला थे तामरी
भन ल्हाना सेम लसी ड्यान्तोःला,
आहिन्सम यहाड थे तामग्याम थारेड
तला। २ स्वर्गदूतगदेसे यहाडला आखे
म्हेमेदा थेःना लबा परमेश्वरला
बचनरी पक्का अधिकार मुबा। थे
ताम अन्छार आभ्रबा पाप लबा
म्हिगदेदा परमेश्वरसे ठीक सजाय
पिन्जी। ३ थेतबासेलमा येशू ख्रीष्टसे
पिन्बा चु घेन थार्बादा यहाडसे वास्ता
आलनी भिसम भन यहाड चा खाहड्
लसी सजायग्याम स्योम्याड्ला? चु
थार्बाला बारेरी डाच्छा प्रभुसेन थेःना
लजी। ओच्छे प्रभुसे थेःना लबा

ताम थे:बा म्हिगदेसे चु ताम सत्य
हिन्ना भिसी य्हाडदा घोना लजी।
४परमेश्वरसेनोन चिनुगदे उन्सी,
ल्हानान थरीला उदेकला गेदेन
शक्तिशाली गेगदे लसी, ओच्छे ह्वाडसे
म्हन्बा अन्छार ह्वाडला आत्मा
मोलमगदे भो लसी पिन्सी चु थाबा चा
सत्य हिन्ना भिसी पक्का लजी।

**य्हाडदा परमेश्वर मुबा ग्लारी
भोर्बारी येशू म्हि दो:सी फेप्खबा**

५परमेश्वरसे स्वर्गदूतगदेदा य्हाडसे
ताम लबा लिच्छाला धुइरी शासन
लबा अधिकार पिन्बा आरे।†
६परमेश्वरला बचनरी ग्ला गिकरी
चुहङ् भिसी म्हि गिकसे भिबा मुला,

“म्हि जजा हिन्ना, तसैनोन
ह्वाडसे तिगदा थेदा वास्ता
लमुला?

ओच्छे म्हिला भा खाल हिन्ना,
ह्वाडसे तिगदा थेला सुर्दा
लमुला?

७ह्वाडसे थेदा तिगै धिनना लागिरी
स्वर्गदूतगदे भन्दा जजा
स्होजी।

तसैनोन ह्वाडसे थेदा
स्थान्दोगदेसे ल्हानान
मानदेन जयजयकार लबा
मुकुट कूसी पिन्जी।

८ओच्छे ह्वाडसे जम्मान स्हेगदेथोरी
शासन लबा अधिकार थेदा
पिन्बा मुला।”*

परमेश्वरसे जम्मान स्हे म्हिगदेला
तहरी थान्मा थेला अधिकाररी
आरेबा स्हेगदे तिगैनोन आरेबा।
तर दान्देला चु धुइरी य्हाड
जम्मान स्हेगदे म्हिला तहरी मुबा
आम्नाङ्मुला। ९तर तिगै धिनना
लागिरी स्वर्गदूतगदे भन्दा जजा
तबा येशूदा य्हाडसे म्नाङ्बा मुला।
परमेश्वरला दयामायासे लमा थे
जम्मालान लागिरी सिजी। थेहङ्
लसी सिबासे लमा थेदा ल्हानान
मानदेन जयजयकार लबा मुकुट
कूसी पिन्जी।

१०परमेश्वरसे ह्वाडला लागिरी
जम्मान स्हे ह्वाडसेन स्होबा मुबा।
ओच्छे ह्वाडला कोलागदेदा ह्वाडसे
याङ्बा य्हालदेन शक्ति पिन्बाला
लागिरी थाबा पिन्बा येशूदा दुख
नापुङ्सी पाको स्होबा चा परमेश्वरदा
ज्यबा छोर्जी, ११तिगदा भिसम येशूसे
पापग्याम फेसी चोखो तना लबा
जम्मान म्हिगदेदेन येशू परमेश्वरलान
सन्तान हिन्ना। थेतबासेलमा थेनीगदेदा
आले आडा भिसी पाङ्बारी येशू
आपे:मुला। १२येशूसे परमेश्वरदा
चुहङ् भिसी सुङ्जी,

२:५ चु भिबा चा स्वर्गदूतगदेदा शासन लबारी आपिन्नी। तर येशूदा शासन लबा अधिकार
पिन्जी भिबा हिन्ना।

२:६-८ भजन ८:४-६

“डाइ डाला आले आडागदेला
गुडरी हाडसे लबा गेला बारेरी
पाड्ला,
ओच्छे मण्डलीला गुडरी
डाइ हाडला जयजयकार
लला।”*

१३दोःसी येशूसे चुहड् भिसी सुड्जी,
“डाइ परमेश्वरथोरीन भर लला।”

थेहड् लसी दोःसीनोन

“च्यागो, दान्दे डा परमेश्वरसे
डादा पिन्बा चु कोलागदेदेन
छ्यामनोन मुला” भिसी
सुड्जी।*

१४थे कोलागदेला लहुइ स्यादेन
काला तबासे लमा येशूला लहुइएनोन
थेनीगदेला हड्बान स्यादेन काला
दोजी। ओच्छे म्हिदा नाश लबा
शक्ति थोबा शैतानदा नाश लबारी येशू
हाडनोन सिजी। १५ओच्छे सिला वा
भिसी सदन लोड्सी चिबा म्हिगदेदा
येशूसे लोड्बाग्याम फेजी। १६चुहड्
लसी येशूसे स्वर्गदूतगदेला लागिरी
थेहड् लबा आहिन, तर अब्राहामला
सन्तानना[†] लागिरी थेहड् लबा
हिन्ना भिबा ताम यहाडदा था मुला।*
१७थेतबासेलमा म्हिगदेला पाप माफ
लबाला लागिरी परमेश्वरसे पिन्बा
गेरी भर तबादेन दया मुबा परमेश्वरला
मन्दिररी पूजा लबा मुल म्हि दोतोःला।

थेहड्बा म्हि दोबाला लागिरी जम्मान
तामरी येशू हाडलान आले आडागदे
हड्बान दोतोःबा मुबा। १८शैतानसे
फसब लबारी म्हाइमा येशू हाडसेन
ल्हानान दुख नाजी। थेतबासेलमा
शैतानसे फसब लबारी म्हाइबागदे
जम्मादान थेसे जोगब लखम्ला।

येशू मोशा भन्दा घ्रेन हिन्ना

३ थेतबासेलमा परमेश्वरसे
हाडलान म्हिगदे स्होबाला
लागिरी धम्बा ज्योज्यो आले नाना
आडागदे, यहाडसे परमेश्वरसे
पुइखबा परमेश्वरला मन्दिररी पूजा
लबा मुल म्हि येशूदा च्यागे। २मोशा
परमेश्वरला म्हिगदेला गुडरी गे
लबाला लागिरी भर तबा म्हि मुबा
हड्बानोन येशूएनोन हाडदा गे लपुड्बा
परमेश्वरला लागिरी भर तबा मुबा।*
३दिमसे भन्दा दिम स्होबा म्हिसे
मान याड्बा हड् लसी मोशासे भन्दा
येशूसे भन ल्हाना मान याड्बा मुला।
४खजिबै दिम खजिबै म्हिसे स्होबा
तमुला। तर जम्मान स्हे स्होबा चा
परमेश्वरनोन हिन्ना। ५मोशा चा
परमेश्वरला म्हिगदेदा च्याबा जम्मान
तामरी भर तबा नोकर मुबा। थेसे
परमेश्वरला म्हिगदेदा लिच्छा तिग
तला भिबा ताम पाड्मुबा। ६तर

२:१६ “अब्राहामला सन्तान” भिबा चा परमेश्वरदा विश्वास लबा म्हिगदे हिन्ना।

२:१२ भजन २२:२२ २:१३ यशै ८:१७-१८ २:१६ गला ३:७; यशै ४१:८

३:२ गन्ती १२:७

ख्रीष्ट चा दिमला भर तबा भा गिक
हड्बान परमेश्वरला दिमरी अधिकार
याड्बा मुल भा हिन्ना। चुदे यहाडसे
लबा आशथोरी पूरान भर लसी
लिच्छाधोनान विश्वासरी कोड्सी
चिजी भिसम यहाडएनोन परमेश्वरला
दिमला कोलागदे दोला।

परमेश्वरला लिच्छा भ्रउ

७ थेतबासेलमा परमेश्वरला आत्मासे
चुहड् भिसी सुड्बा मुला,

“तिनी एनीगदेसे परमेश्वरला काइ
थे:जी भिसम,

८ एनीगदेला आखे म्हेमेसे
परमेश्वरला बिरोध लबा हड्
लसी

एनीगदेसे हाडला सेम कोड्ना
थालउ।

थेनीगदेसे तोडतोडबा ग्लारी
परमेश्वरला सेम च्यासी
परमेश्वरला बिरोध लबा
मुबा।

९ थेरी एनीगदेला आखे म्हेमेगदेसे
बोगल न्ही दिडधोना डाइ
लबा गे म्राड्सीनोन
डाला सेम च्यासी डादा
विश्वास आलनी।

१० थेतबासेलमा थेनीगदेदा म्राड्सी
डादा बोमो रे:जी।
ओच्छे ‘चु म्हिगदेसे डादा
विश्वास लबा ख्लाजी,

डाइ पाड्बा थेनीगदेसे
आड्यान्नी’ भिसी डाइ
भिजी।

११ डाइ बोमोला भोकरी थेनीगदेदा
‘डाइ स्होबा ब्लप्बा न्हबा
ग्लारी थेनीगदे खाइमै
वाड्आम्याड्’ भिसी घ्रान
फाजी।”*

१२ ज्योज्यो आले नाना आडागदे,
होशियार तसी चिउ। एनीगदे न्हडरी
खालैनोन विश्वास आलबा पापी सेम
थोसी छोन्बो परमेश्वरदा थारुलागो।
१३ तर परमेश्वरला बचनरी “तिनी”
भिबा धुइ मुतेधोना जम्मासेन गिकसेम
गिकदा सदन आँट पिन्सीन चिउ।
आहिन्सम पापसे फसब लसी एनीगदे
न्हडरी खालैला सेम कोड्ना लला।
१४ यहाडसे शुरुरी लबा विश्वासरी
यहाड सोतेधोना कोड्सी चिजी
भिसम यहाडसे ख्रीष्टग्याम याड्बा
हक याड्ला। १५ बचनरी चुहड् भिसी
भ्रिबा मुला,

“तिनी एनीगदेसे परमेश्वरला काइ
थे:जी भिसम
बिरोध लबा धिनरी हड् लसी
एनीगदेसे हाडला सेम कोड्ना
थालउ।”*

१६ परमेश्वरला काइ थे:सीनोन
थेदा बिरोध लबा म्हिगदे खाल
मुबा? तिग मोशासे मिश्र यहुल्साग्याम
फेसी भबा म्हिगदेन आहिन? हिन्ना।

१७ खाल म्राङ्सी परमेश्वर बोगल न्ही दिङधोना बोमो खजी? तोडतोडबा ग्लारी सिबा थे पाप लबा ओन्माला म्हिगदेदा म्राङ्सी आहिन? हिन्ना।
 १८ परमेश्वरसे डाइ स्होबा बलप्बा न्हबा ग्लारी वाङ्आम्याङ् भिसी खाल्दा सुङ्मुबा? परमेश्वरसे कुल्बा ताम आङ्यान्बा थेनोन म्हिगदेदा सुङ्बा आहिन? हिन्ना।
 १९ थेतबासेलमा थेनीगदेसे विश्वास आलबासे लमा थेनीगदे बलप्बा न्हबा ग्लारी वाङ्आम्याङ्नी भिबा ताम य्हाङ्से था याङ्बा मुला।

परमेश्वरला म्हिगदेला लागिरी बलप्बा न्हबा ग्ला

४ य्हाङ्दा बलप्बा न्हबा ग्लारी वाङ्पुङ्ला भिसी परमेश्वरसे कबुल लबा मुला। थेतबासेलमा य्हाङ् होशियार तसी चिङ्, आहिन्सम एनीगदे न्हङ्ला खालै थे बलप्बा न्हबा ग्लारी वाङ्आम्याङ्। २ तिग्दा भिसम ओन्माला म्हिगदेदा हङ्नोन य्हाङ्दाएनोन थार्बा पिन्बा समाचार थे:ना लबा मुला। तर थेनीगदेला लागिरी थे समाचार गे आखेल्बा तजी। तिग्दा भिसम थेनीगदेसे थे समाचार सेमरी थान्सी विश्वास आलनी। ३ दाहेन्से य्हाङ् विश्वास लबागदे चा थे बलप्बा न्हबा ग्लारी वाङ्म्याङ्ला। परमेश्वरसे चुहङ् भिसी सुङ्बा मुला,

“डाइ बोमोला भोकरी ‘थेनीगदेदा डाइ स्होबा बलप्बा न्हबा ग्लारी थेनीगदे खाइमै वाङ्आम्याङ्’ भिसी घान फाजी।”

तसैनोन जम्बुलिङ् स्होमाहेन्सेन परमेश्वरसे लबा जम्मान गे पूरा तबान मुला। * ४ तिग्दा भिसम थेसे अर्गु ग्लारीनोन निसरेला बारेरी चुहङ् भिसी सुङ्बा मुला,

“परमेश्वरसे जम्मान गे लसी जिन्माहेन्से निसरेमाकुनु बलप्बा न्हजी।”*

५ दो:सी थेसे चु तामला बारेरी चुहङ् भिसी सुङ्बा मुला,

“डाइ बलप्बा न्हबाला लागिरी स्होबा ग्लारी थेनीगदे खाइमै वाङ्आम्याङ्।”*

६ तसैनोन परमेश्वरसे स्होबा थे बलप्बा न्हबा ग्लारी अभन कोइ कोइ म्हि वाङ्म्याङ्ला। ओच्छे डाच्छान थार्बा पिन्बा समाचार थे:सीनोन कुल्बा ताम आङ्यान्बा म्हिगदे चा थे बलप्बा न्हबा ग्लारी वाङ्आम्याङ्नी। ७ थेतबासेलमा परमेश्वरसे बलप्बा न्हबा ग्लारी वाङ्म्याङ्बाला लागिरी अर्गु धिन स्होजी। थे धिन चा “तिनीला धिन” भिसी तोगब लजी। परमेश्वरसे ल्हानान दिङ लिच्छा दाऊद ग्लेग्याम चुहङ् भिसी सुङ्जी,

“तिनी एनीगदेसे परमेश्वरला काड
थे:जी भिसम हाडला सेम
कोङ्ना थालउ।”*

चु ताम डाइ डाच्छाएनोन पाङ्सी
जिन्बा मुबा।

८ चुदे यहोशूसे थेनीगदेदा ब्लप्बा
न्हबा ग्लारी धोना लबा हिन्सम
परमेश्वरसे थे अर्गु धिनना तामनोन
आते:सेला मुबा।^१ ९ थेतबासेलमा
परमेश्वरसे निसरेकुनु ब्लप्बा न्हबा
हङ् लसी परमेश्वरला म्हिगदेला
लागिरीनोन ब्लप्बा न्हबा ग्ला
स्होबा मुला।^{१०} परमेश्वरसे गे
लसी जिन्माहेन्से ब्लप्बा न्हबा हङ्
लसी ब्लप्बा न्हबा ग्लारी वाङ्बा
म्हिगदेसेनोन गे लसी जिन्माहेन्से
ब्लप्बा न्हला।^{११} परमेश्वरसे
कुल्बा ताम आङ्ग्यान्बासे लमा
ओन्माला म्हिगदे ब्लप्बा न्हबा ग्लारी
वाङ्आम्याङ्नी। तर यहाड न्हडरी
खालैनोन थेहङ् आतबाला लागिरी
यहाड जम्मासेन थे ब्लप्बा न्हबा
ग्लारी वाङ्बारी खम्तेधोना भङ लङ।

^{१२} परमेश्वरला छोन्बो बचन
मी गे लसी चिबा शक्ति हिन्ना। चु
न्हीलोनपट्टि धार मुबा तरवार भन्दा
छ्यार्बा मुला। चुसे म्हिला आत्मा,
ल्हुइ, थेला जी जीदेन नखुला
टाङ्गदेन फेला ओच्छे म्हिला सेमला
तामदेन लबारी म्हाइबा गे ठीक मुला

कि आरे भिसी च्याला।^{१३} परमेश्वरसे
म्राङ्आखम्बा ताम तिगैनोन आरे।
थेला डाच्छा जम्मान ताम प्रस्टन
मुला। यहाडसे लबा जम्मान गेला
हिसाब थेदान उन्तो:ला।

**परमेश्वरला मन्दिररी पूजा लबा
मुल म्हिगदे न्हडरी येशू जम्मान
भन्दा घेन हिन्ना**

^{१४} थेतबासेलमा यहाडसे लबा
विश्वासरी अभ यहाड कोङ्सी
चिङ। तिगदा भिसम स्वर्गरी फेप्बा
परमेश्वरला भा येशून परमेश्वरला
मन्दिररी पूजा लबा यहाडला मुल
म्हि हिन्ना।^{१५} परमेश्वरला मन्दिररी
पूजा लबा मुल म्हिगदे न्हडला घेन
म्हि यहाडला येशूदा यहाडला जम्मान
कमजोरीगदे था मुला। तिगदा भिसम
थेदाएनोन यहाडदा हङ्गनोन जम्मान
तामरी फसब लबारी म्हाइजी। तर
थेसे पाप चा आलनी।^{१६} थेतबासेलमा
यहाड आलोङ्ना दया लबा
परमेश्वरला ठिला डाच्छापट्टि निङ।
दुख तबा धुइरी यहाडसे थेरी थेला
दयामायाग्याम ह्यो याङ्ला।

५ परमेश्वरला मन्दिररी पूजा
लबा खजिबै मुल म्हि धम्मा
म्हिगदे न्हङ्ग्यामनोन धम्मुला।
म्हिगदेला साटोरी परमेश्वरदा
फुल्तो:बा पापला बलिदेन भेटी

४:८ मोशा सिमाहेन्से इस्राएलीगदेदा यहोशूसे कनान भिबा यहुल्सारी भोर्बा गे लजी।

४:७ भजन ६५:७-८

फुलबाला लागिरी थेदा धम्बा हिन्ना।
 २थे मुल म्हिसे आसेबा आघोबादेन
 ग्याम थोर्सी भ्रबागदेदा आछेर्ना ज्यना
 लसी घोना लखम्मुला। तिगदा भिसम
 थे हाडएनोन कमजोर म्हि हिन्ना।
 ३थेतबासेलमा स्थहान्दो म्हिगदेला
 पापला लागिरी जे आहिन, तर थेसे
 हाडला पापला लागिरीनोन बलि
 फुलतो:मुला।

४खालै म्हिसे हाडला सेमसे
 म्हाइजी भिदेमा परमेश्वरला मन्दिररी
 पूजा लबा मुल म्हिसे याड्बा
 मान आयाड्। तर परमेश्वरसेन थे
 मान याड्बा म्हि स्होबारी धम्ला।
 थेहड् लसीन हारूनदाएनोन थेनोन
 परमेश्वरसे धम्जी। * ५चुहड् लसी
 ख्रीष्टसेनोन हाडनोन परमेश्वरला
 मन्दिररी पूजा लबा मुल म्हि दोबारी
 मान आम्हाइनी। तर थेदा

“ए डाला भा हिन्ना,
 डा तिनी एला आबा दोबा
 मुला”

भिसी सुड्बा परमेश्वरसेन धम्जी। *
 ६ओच्छे परमेश्वरसे अर्गु ग्लारीनोन
 चुहड् भिसी सुड्बा मुला,
 “ए मल्कीसेदेक हड्नोन
 सदनना लागिरी परमेश्वरदा
 तेन्बा म्हि हिन्ना” *

७येशू जम्बुलिडरी म्हि दोसी
 धन्छ्यामा ल्हानान क्रासी हाडदा
 सिबाग्याम सोना लखम्बा परमेश्वरदेन

छ्याम प्रार्थना लजी। ओच्छे सोजो
 तसी कुल्बा ताम ड्यान्बासे लमा
 परमेश्वरसे थेला प्रार्थना सान्जी। ८येशू
 परमेश्वरला भा तसीनोन हाडसे नाबा
 दुखग्याम परमेश्वरसे कुल्बा ताम
 ड्यान्बारी लोप्जी। ९येशू जम्मान तामरी
 पाको तमाहेन्से थे हाडसे कुल्बा ताम
 ड्यान्बा जम्मान म्हिगदेला लागिरी
 जुकजुकधोना थार्बा पिन्बा मुहान
 दोजी। १०ओच्छे परमेश्वरसेन थेदा
 मल्कीसेदेकदा हड्नोन परमेश्वरदा
 तेन्बा मुल म्हि दोबारी धम्जी।

विश्वास थारुलागै भिसी होशियार तना लबा

११चु तामला बारेरी एनीगदेदा डन्से
 पाड्तो:बा ताम ल्हानान मुला। तर
 एनीगदेदा घोना लबारी गाहो तबा
 मुला। तिगदा भिसम एनीगदेसे योना
 आघोमुला। १२तिनीधोना मी एनीगदे
 स्थहान्दोदा लोप्खम्बा म्हि ततो:मुबा।
 तर एनीगदेदा मी अभ परमेश्वरला
 बारेरी जजाबा तामगदेएनोन स्थहान्दो
 म्हिसे लोप्तो:बा मुला। थेतबासेलमा
 एनीगदे चबा स्हेला साटोरी अभ
 ड्हे थुड्बा कोलागदे हड्बान मुला।
 १३एनीगदे ड्हेला भररी जे सोबा
 कोलागदे हड्बा म्हिसे चा ज्यबादेन
 नड्बा तिग हिन्ना थे ताम था आत।
 १४तर चबा स्हे चबा घेन म्हिसे चा
 धिन धिननोन हाडसे लबा गेग्याम

ज्यबादेन नइबा तिग हिन्ना थे ताम
था याङ्ला।

६ थेहङ् बा भिसम य्हाङ् ख्रीष्टला
बारेरी डाच्छा लोप्बा तामगदे
जे आतना अभ्र घेन घेन तामगदे
लोप्बान पाको म्हि दोगे। अथवा नाश
तना लबा गेगदे ख्लासी परमेश्वरपट्टि
दोःबा तामदेन परमेश्वरदा विश्वास
लबा ताम य्हाङ्दा घरिघरि लोप्आतोः।
२ओच्छे बप्तिस्माला बारेरी लोप्बा
तामगदे, स्थान्दोथोरी या थान्सी
प्रार्थना लबा तामगदे, सिबागदे
दोःसी सोला भिबा तामगदेदेन
जुकजुकधोनाला सजाय याङ्ला
भिबा तामगदेला बारेरीनोन एनीगदेदा
दाहेन्से लोप्आतोः। ३चुदे परमेश्वरसे
सेम लजी भिसम य्हाङ्से घेन घेन
तामएनोन लला।

४तिग विश्वास ख्लासी निबागदेदा
दोःसी भसी परमेश्वरपट्टि दोःपुङ्बारी
खम्ला? आखम। तिग्दा भिसम जुन
म्हिसे डाच्छा तिरेम परमेश्वरला
य्हाल याङ्सी स्वर्गला मोलमदेन
परमेश्वरला आत्माएनोन याङ्बा
मुला। ५थेनीगदेसे परमेश्वरला
बचनएनोन था याङ्बा मुला ओच्छे
खबा धुङ्ला बारेरी परमेश्वरसे लबा
शक्तिशाली गेगदेएनोन म्राङ्सी जिन्बा
मुला। ६थे जम्मान ताम था तसीनोन
विश्वास लबा ख्लासी न्होङ्सी निबा
म्हिगदेदा दोःसी हाङ हाङला पाप

ख्लासी परमेश्वरपट्टि दोःपुङ्बारी
खम्नोन आखम। तिग्दा भिसम
थेहङ्बा म्हिगदेसे परमेश्वरला भादा
दोःसीनोन कुसरी टाँगब लसी जम्मान
म्हिला ओन्छाडरी येथूला बेइज्जत
लला।

७ल्हानान हङ् नाम ताइमाहेन्से बु
भम्सी खेती लबागदेसे ढ्वबा अन्न
ल्हानान रोला। थेहङ्बा बु वारीसे
परमेश्वरग्याम मोलम याङ्ला। ८
९तर थे बुरी पुजु दोङ्गदे जे फुङ्जी
भिसम थे गे आखेल्ला तला। थेहङ्बा
बुदा परमेश्वरसे केःबारी छ्याङ्ला।
लिच्छा थे पुजु दोङ्गदे मेरी खाङ्ला।

६डाला सेम निबा ह्योगदे, डन्से
चुहङ्बा ताम लसैनोन एनीगदेला
बारेरी चा ज्यबा ताम तला भिसी
म्हन्बा मुला। ओच्छे थार्बा याङ्सी
एनीगदेसे ल्हानान ज्यबा स्हेगदे
याङ्ला। १०परमेश्वरसे सदन ठीक
निसाफ लमुला, ओच्छे एनीगदेसे
परमेश्वरला म्हिगदेदा हो लसी
परमेश्वरदा माया उन्बा मुला। अभ्र
एनीगदेसे थेहङ्बा गे लबान मुला,
चु ताम परमेश्वरसे खाइमै आम्लेः।
११एनीगदे जम्मासेन हाङ हाङसे
लबा आश पूरान याङ्बाला लागिरी
हुक्क तसी सोतेधोना भङ् लसी
गे लला भिसी डन्से म्हन्बा मुला।
१२परमेश्वरसे पिन्ना भिसी कबुल
लबा स्हेगदे याङ्बाला लागिरी एनीगदे

ब्लेगु थादोगै। ओच्छे विश्वास लसी जस्तोन दुख तसै नाबा म्हिगदे हड् तसी भ्रगै भिबा डन्ना सेम मुला।

परमेश्वरसे लबा कबुल

१३ परमेश्वरसे यहाडला म्हेमे अब्राहामदा मोलम पिन्ना भिसी कबुल लमा ह्राड भन्दा घेन स्थान्दो खालै आरेबासे लमा परमेश्वरसे ह्राडलान मिनरी घान फासी चुहड् भिसी सुड्जी, १४ “डाइ एदा मोलम पिन्नोन पिन्ना, ओच्छे एला सन्तान ल्हानान तला।”* १५ परमेश्वरसे पिन्ना भिसी कबुल लबा मोलम आयाड्तेधोना अब्राहामसे भ्रान्सी चिबासे लमा थे मोलम याड्जी।

१६ खालै म्हिसे तिगै ताम पक्का लतो:जी भिसम थेसे ह्राड भन्दा घेन्ना मिनरी घान फामुला, ओच्छे आढिक्का तामगदे घान फासी ढिक्का लमुला। १७ परमेश्वरसे पिन्ना भिसी कबुल लबा मोलम याड्बा म्हिगदेदा ह्राडसे लबा कबुल खाइमै आपोमुला भिबा ताम उन्बा सेम लजी। थेतबासेलमा परमेश्वरसे घान फासी थे कबुल पक्का लजी। १८ परमेश्वरसे यहाडदेन छ्याम कबुलएनोन लबा मुला, घानएनोन फाबा मुला। चु ताम न्ही चा खाइमै आपोमुला। ओच्छे परमेश्वरसे खाइमै लुसीला ताम आलमुला। थेतबासेलमा

जोगब तबाला लागिरी परमेश्वरला डाच्छा निबा यहाडसे घेन आँट याड्ला। ओच्छे यहाडसे यहाडला डाच्छापट्टि थान्सी पिन्बा आशएनोन याड्ला। १९ चु आश चा यहाडला आत्मादा जोगब लबा पक्का सत्य ताम हिन्ना। चुनोन आशग्याम यहाड परमेश्वर धन्छ्याबा ग्लाधोना धोला। २० यहाडला लागिरी येशू यहाड भन्दा डाच्छान थे ग्लारी फेप्सी धन्छ्यासी जिन्बा मुला। ओच्छे येशू सदनना लागिरी परमेश्वरदा तेन्बा म्हि मल्कीसेदेक हड्बान मुल म्हि दोबा मुला।

परमेश्वरदा तेन्बा मल्कीसेदेक

७ चु मल्कीसेदेक शालेम भिबा यहुल्साला ग्लेदेन जम्मान भन्दा घेन परमेश्वरदा तेन्बा म्हि मुबा। अब्राहाम गोर बिल ग्लेदेन लडाइ लसी ढासी दो:सी खबा धुइरी मल्कीसेदेकसे स्याप्सी मोलम पिन्जी। २ अब्राहामसे ग्लेगदेदा ढासी भबा जम्मान स्हेगदेग्याम भो च्युइला भो गिक फेसी मल्कीसेदेकदा पिन्जी। मल्कीसेदेक भिबाला अर्थ गिक चा ठीक निसाफ लबा ग्ले हिन्ना। ओच्छे थे शालेम यहुल्साला ग्ले तबासे लमा मल्कीसेदेक भिबाला अर्गु अर्थ चा शान्तिला ग्ले हिन्ना। ३ मल्कीसेदेकला आबा आमादेन आखे म्हेमे खाल हिन्ना

भिसी तिगै भ्रिसी थान्बा आरे। ओच्छे थे न्हबादेन सिबा तामला बारेरीनोन तिगै भ्रिसी थान्बा आरे। परमेश्वरला भा हङ्गनोन थेएनोन सदनना लागिरी परमेश्वरदा तेन्बा म्हि दोजी।

४ मल्कीसेदेक गाते घ्रेन म्हि मुबा भिबा ताम एनीगदेदा था तला। यहाङला म्हेमे अब्राहामसेनोन लडाइरी ढासी भबा जम्मान स्हेग्याम भो च्युइला भो गिक थेदा पिन्जी। ५ परमेश्वरला मन्दिररी पूजा लबा लेवी वंशला म्हिगदेएनोन अब्राहामलान सन्तान तसैनोन परमेश्वरसे मोशादा पिन्बा ठिम अन्छार ह्वाङलान म्हिगदेग्याम भो च्युइला भो गिक किन्मुबा। ६ परमेश्वरदा तेन्बा मल्कीसेदेक लेवी वंशला आहिन। तसैनोन थेसे परमेश्वरला मन्दिररी पूजा लबा म्हिगदेला म्हेमे अब्राहामग्याम भो च्युइला भो गिक किन्जी। ओच्छे परमेश्वरसे लबा कबुलगदे याङ्तोःबा अब्राहामदा थेसे मोलम पिन्जी। ७ घ्रेन म्हिसे जजा म्हिदा मोलम पिन्ना भिबा ताम जम्मादान था मुला। ८ परमेश्वरला मन्दिररी पूजा लबा सिसी निबा म्हिगदेसे भो च्युइला भो गिक किन्जी। तर परमेश्वरदा तेन्बा खाइमैनोन आसिबा मल्कीसेदेकसेनोन भो च्युइला भो गिक किन्बा मुबा। ९ लेवीगदेसे

म्हिगदेग्याम भो च्युइला भो गिक किन्मुबा। तर चुहङ्गएनोन पाङ्खम्ला, लेवीगदेला म्हेमे अब्राहामसे मल्कीसेदेकदा भो च्युइला भो गिक पिन्माहेन्से लेवीगदेसेनोन पिन्बा तला। १० तिगदा भिसम मल्कीसेदेकसे अब्राहामदा स्याप्मा लेवी हाङला म्हेमे अब्राहामला ल्हुइरीन मुबा।

येसू मल्कीसेदेक हङ्गबान हिन्ना

११ लेवी वंशला म्हिगदेसे परमेश्वरला मन्दिररी पूजा लबा गे याङ्बा मुबा। थेतबासेलमा इस्राएलीगदेसे परमेश्वरग्याम ठिम याङ्जी। तर परमेश्वरला मन्दिररी पूजा लबा लेवीला गे लबा ठिम अन्छार खालै म्हिदा तिगै दोष आरेबा म्हि स्होबारी खम्बा हिन्सम हारूनना सन्तानना^१ साटोरी मल्कीसेदेक हङ्गबा परमेश्वरदा तेन्बा स्थहान्दो म्हि तिगदा खतोःजी? १२ तिगदा भिसम परमेश्वरला मन्दिररी पूजा लबा मुल म्हि स्थहान्दोन खाल्ला पोमाहेन्से ठिमएनोन पोतोःला।

१३ यहाङला प्रभुला बारेरी चु तामगदे पाङ्बा मुला, थे अर्गु वंशला हिन्ना। थेला वंशला खालैसेन परमेश्वरदा भेटी फुल्बा ग्लारी गे लबा आरे। १४ यहाङला प्रभु मी यहूदाला वंशरी न्हबा हिन्ना। यहूदाला वंशग्याम परमेश्वरला मन्दिररी पूजा लबा

म्हि स्होबा तामला बारेरी मोशासे तिगैनोन पाङ्बा आरे भिबा ताम जम्मादान था मुला।

१५ मल्कीसेदेक हङ्बान परमेश्वर-
दा तेन्बा स्थान्दो म्हि खसी जिन्बासे
लमा दाहेन्से चु जम्मान ताम भन
ज्यना लसी घोला। १६ थे यहाङला
आखे म्हेमेला ठिम अन्छार स्होबा
परमेश्वरदा तेन्बा म्हि आहिन। तर
खाइमै नाश आतबा जुनीला शक्ति-
ग्याम स्होबा परमेश्वरदा तेन्बा
म्हि हिन्ना। १७ तिगदा भिसम थेला
बारेरी बचनरी चुहङ् भिसी भिबा
मुला, “मल्कीसेदेक हङ्नोन ए
सदनना लागिरी परमेश्वरदा तेन्बा
म्हि हिन्ना।” * १८ तिगदा भिसम
थे डाचछाला ठिम चा तिगै
लआखम्बादेन गे आखेल्ला तबासे
लमा भ्याङ्बा मुला। १९ तिगदा भिसम
थे ठिमसे खजिबै स्हेदा तिगै दोष
आरेबा स्होआखम्नी। तर दाहेन्से
भन यहाङदा ज्यबा आश पिन्बा
मुला। थे आशग्याम यहाङ परमेश्वरला
डामरी धोखम्ला।

२० परमेश्वरसे ह्याङला ताम पक्का
लबाला लागिरी घान फासी चु छार
ठिम शुरु लबा हिन्ना। चुहङ्बा घान
चसी परमेश्वरसे पूजा लबा स्थान्दो
खजिबै म्हिगदेदा धम्बा आरे, २१ तर
येशू चा परमेश्वरसे घान फासी
परमेश्वरला मन्दिररी पूजा लबा म्हि

स्होबा हिन्ना। थेला बारेरी बचनरी
चुहङ् भिसी भिबा मुला,

“परमप्रभुसे घान फासी जिन्बा
मुला,

थेसे ह्याङला सेम खाइमै आपो।

‘ए सदनना लागिरी परमेश्वरला
मन्दिररी पूजा लबा म्हि
हिन्ना।’ ”

२२ परमेश्वरसे लबा ज्यबा कबुलला
जिम्मा येशूसे किन्बा मुला।

२३ ओच्छे अर्गु ताम चा डाचछा
परमेश्वरला मन्दिररी पूजा लबा
म्हिगदे ल्हानान मुबा। तिगदा भिसम
थेनीगदे सिसी निबासे लमा सदन
ह्याङला गे लबारी आखम्मुबा। २४ तर
येशू चा जुकजुकधोनान सोसी चिबासे
लमा थे सदनना लागिरी परमेश्वरला
मन्दिररी पूजा लबा म्हि दोबा मुला।
२५ थेतबासेलमा येशूदा विश्वास लसी
परमेश्वर मुबा ग्लारी खबा म्हिगदेदा
थेसे सदनना लागिरी थाना लबारी
खम्ला। तिगदा भिसम थेनीगदेला
लागिरी परमेश्वरदेन छ्याम प्रार्थना
लसी पिन्बारी येशू सदन सोसी चिला।

२६ यहाङदा तोःबा परमेश्वरदा
तेन्बा मुल म्हि चुनोन येशू हिन्ना। थे
पापनोन आलबादेन चोखो ओच्छे
तिगै दोष आरेबा मुला। थेतबासेलमा
परमेश्वरसे थेदा पापी म्हिगदेग्याम
फेसी स्वर्गला जम्मान भन्दा मुल ठिरी
धन्छ्यापुङ्बा मुला। २७ परमेश्वरला

मन्दिररी पूजा लबा अर्गु मुल म्हिगदेसे म्हिगदेला पाप माफ लबारी धिन धिननोन बलि फुल्लो:मुबा। तर येशूसे चा थेहङ् लसी बलि फुल्लआतो:नी। तिगदा भिसम थे हाडनोन तिरेमरीन सदनना लागिरी बलि तसी जिन्बा मुला। ^{२८}तिगदा भिसम मोशादा पिन्बा ठिम अन्छार कमजोर म्हिगदेदा परमेश्वरला मन्दिररी पूजा लबा मुल म्हि स्होबारी धम्जी। तर परमेश्वरला भा येशूदा थे ठिम भन्दा लिच्छा परमेश्वरसे हाडसे घान फाबा अन्छार धम्बा मुला। ओच्छे सदनना लागिरी तिगै दोष आरेबा स्होबा मुला।

येशू परमेश्वरदा तेन्बा य्हाडला मुल म्हि हिन्ना

८ डन्से पाङ्बा मुल तामएनोन चुनोन हिन्ना, य्हाडला जम्मान भन्दा घेन परमेश्वरदा तेन्बा मुल म्हि स्वर्गरी परमेश्वरला दाहिनेपट्टि ठिरी धन्छ्याबा मुला। ^{*} ^२येशू परमेश्वरदा तेन्बा मुल म्हि दोसी स्वर्गला जम्मान भन्दा चोखो ग्लारी गे लमुला। चु चोखो ग्ला म्हिसे स्होबा आहिन, तर परमेश्वरसे स्होबा सत्य पाल हिन्ना।

^३परमेश्वरला मन्दिररी पूजा लबा जम्मान मुल म्हिगदे परमेश्वरदा भेटीदेन बलि फुल्लाला लागिरी धम्बा हिन्ना। थेतबासेलमा परमेश्वरदा तेन्बा य्हाडला मुल येशूसेनोन परमेश्वरदा

तिगै स्हे फुल्लोन तो:ला। ^४येशू चु जम्बुलिडरी मुबा हिन्सम खाइमै परमेश्वरदा तेन्बा म्हि आदोसेला मुबा। तिगदा भिसम मोशादा पिन्बा ठिम अन्छार भेटी फुल्लबा परमेश्वरला मन्दिररी पूजा लबा लेवी वंशला म्हिगदे मी चुरी डाच्छाहेन्सेन मुबा। ^५थेनीगदेसे परमेश्वरला मन्दिररी पूजा लबा गे चा स्वर्गरी मुबा सत्य ताम हङ्बा जे हिन्ना, तर स्वर्गरी मुबा सत्य तामनोन चा आहिन। मोशादाएनोन परमेश्वरसे थेहङ्बान लउ भिसी कुल्लबा मुबा। मोशासे परमेश्वरदा तेन्बारी पाल स्होबारी छ्याइमा, “च्यागो, जम्मान ताम डाइ एदा गडरी उन्बा हङ्बान स्होउ” भिसी कुल्लबा मुबा। ^{*} ^६तर येशूसे परमेश्वरदा तेन्बा गे चा परमेश्वरला मन्दिररी पूजा लबा स्थान्दो मुल म्हिगदेला गे भन्दा भन घेन मुला। थेहङ् लसीन परमेश्वरदेन परमेश्वरला म्हिगदेला गुडरी येशूसे लबा छार कबुल थे पुरानो कबुल भन्दा ज्यबा मुला। तिगदा भिसम छार कबुलरी ल्हानान ज्यबा तामगदे मुला। ^७पुरानो कबुलरी तिगै दोष आरेबा हिन्सम थेला ग्लारी दो:सी अर्गु कबुल लनोन आतो:सेला मुबा। ^८तर परमेश्वरसे हाडला म्हिगदेसे लबा गल्ली था याङ्सी चुहङ् भिसी सुङ्जी, “परमप्रभुसे चुहङ् भिसी सुङ्बा मुला,

डाइ इस्राएलला सन्तानदेन
यहूदाला सन्तानदेन छ्याम
छार कबुल लबा धिन खबान
मुला।*

९ थे छार कबुल डाइ थेनीगदेला
आखे म्हेमेगदेदेन छ्याम लबा
कबुल हड्बा आत।
थे धुडरी डाइ थेनीगदेदा यारी
चुड्सी मिश्र यहुल्साग्याम
फेसी भबा मुबा।

परमप्रभुसे चुहड् भिसी सुड्बा
मुला,
थेनीगदे डाइ लबा कबुल
अन्छार आभनी।
थेतबासेलमा डाइ थेनीगदेला
वास्ता आलनी।

१० थे धिन खमाहेन्से डाइ इस्राएलला
सन्तानगदेदेन छ्याम छार
कबुल लला,
डाइ थे ठिम थेनीगदेला सेमरी
भिसी थान्ना।

डा थेनीगदेला परमेश्वर दोला
ओच्छे थेनीगदे डाला म्हि
दोला।

११ ‘परमप्रभुदा डोसेगो’ भिसी दाहेन्से
खालैसेन हाडला खिम्जेमदा,
हाडला ज्योज्यो आले नाना
आडादा लोप्आतोः।
तिग्दा भिसम जजाहेन्से
घेनधोनाला जम्मासेन डादा
डोसेला।

१२ डाइ थेनीगदेसे लबा नड्बा गेला
दोष मेटब लला,
ओच्छे थेनीगदेसे लबा
पाप डाइ दोःसी खाइमै
आढन।”*

१३ चु कबुलदा “छार” भिसी
सुड्बासे लमान परमेश्वरसे डाच्छाला
कबुलदा भोक्टो स्होजी। थे डाच्छाला
कबुल चा भोक्टो तबासे लमा म्हासी
निला।

परमेश्वरदा तेन्बाला लागिरी म्हिसे
स्होबा चोखो ग्ला

६ पुरानो कबुलरी परमेश्वरदा
तेन्बा ठिम मुबा। ओच्छे थे
ठिमरी परमेश्वरदा तेन्बा चोखो
ग्लाला बारेरीनोन भिबा मुबा।
२थे पाल न्हडरी कोठा न्ही मुबा।
डाच्छापट्टिला कोठादा चोखो
ग्ला भिसी भिमुबा। थे कोठारी चा
नाडसल थान्बा ग्लादेन टेबुल मुबा।
थे टेबुलथोरी चा परमेश्वरदा फुल्बा
गेडगदे मुबा। ३थे कोठा भन्दा न्हडरी
अर्गु पर्दा गिक मुबा। थे पर्दा न्हडला
कोठादा चा जम्मान भन्दा चोखो ग्ला
भिसी भिमुबा।* ४थे कोठा न्हडरी
म्हरला धूप म्राबा ग्लादेन डाच्छाला
कबुल थान्बा म्हरसे मोरब लबा चोखो
सन्दोस मुबा। थे सन्दोस न्हडरी
म्हरला ताडरी मन्नदेन म्हेन्दो सार्बा
हारूनना कडी ओच्छे परमेश्वरसे

ह्वाडला म्हिगदेदेन छ्याम लबा कबुल भिसी थान्बा युडबाला पाटीगदे मुबा।* ४ परमेश्वरला य्हालदेन शक्ति थेरी मुला भिसी उन्बाला लागिरी थे सन्दोसथोरी पाप माफ लबा ग्लारी भ्याप मुबा करूब भिबा स्वर्गदूत न्ही मुबा। थे ग्लादा थेन्नीला भ्याप्से घप्सी थान्बा मुबा। तर दान्देन डन्से चु ताम मेलोसेन पाङ्बारी आखम।*

६ चु जम्मान स्हेगदे ठीक लसी जिन्माहेन्से परमेश्वरला मन्दिररी पूजा लबा म्हिगदे ह्वाडसे लतोःबा गेगदे लबारी धिन धिननोन डाच्छापट्टिला चोखो ग्लारी निमुबा।* ७ तर जम्मान भन्दा चोखो ग्लारी चा तिदिङरी तिरेम परमेश्वरला मन्दिररी पूजा लबा मुल म्हि गिक बाहेक स्थान्दो खालै आनिमुबा। थे एनोन थेरी जन्तुला का आभोर्दे निआखम्मुबा। थे का थेसे ह्वाडला पापदेन स्थान्दो म्हिगदेला पापला लागिरी फुल्मुबा।* ८ चु जम्मान तामगदेग्याम डाच्छापट्टिला चोखो ग्ला मुतेधोना मन्दिर न्हडपट्टिला जम्मान भन्दा चोखो ग्लारी वाङ्बा म्नाप आठोङ् भिबा ताम परमेश्वरला आत्मासे उन्बा मुला। ९ चु ताम चा दान्देला धुइ गाते घेन मुला भिसी उन्बा चिनु जे हिन्ना। चु तामग्याम परमेश्वरदा फुल्बा भेटीदेन बलिसे म्हिला सेम चोखो स्होबारी आखम

भिसी उन्बा मुला। १० थे स्हेगदे चा चबा थुड्बादेन म्हिदा चोख्याब लबा ल्हानान थरीला ठिम जे हिन्ना। थे ठिम चा परमेश्वरग्याम छार ठिम आखतेधोनाला लागिरी ल्हुइ चोखो तना लबा ठिम जे हिन्ना, सेम चोखो तना लबा ठिम आहिन।

ख्रीष्टला का

११ तर ख्रीष्ट चा परमेश्वरदा तेन्बा मुल म्हि दोसी दान्दे चुरी मुबा जम्मान ज्यबा स्हेगदे पिन्बाला लागिरी फेप्खबा मुला। थे जम्मान भन्दा घेनदेन चोखो ग्लारी फेप्जी। चु ग्ला चा जम्बुलिङला स्हेगदेग्याम म्हिसे स्होबा ग्ला आहिन। १२ ख्रीष्टसे बोगोदेन बहरला का भोर्सी आहिन, तर ह्वाडलान का भोर्सी तिरेमरीन य्हाडदा जुकजुकधोनान पापग्याम फेबाला लागिरी थे जम्मान भन्दा चोखो ग्लारी फेप्जी। १३ डाच्छाला ठिम अन्छार रा बोगोदेन बहरला का ओच्छे म्हे योमो खाङ्बा मेफ्रा अशुद्ध तबा म्हिगदेदा स्वामा थेनीगदेला ल्हुइ चोखो तमुबा। १४ भन ख्रीष्टला काग्याम य्हाड सोसी छोन्बो परमेश्वरदा तेन्गै भिसी य्हाडदा सिना लबा गे लपुङ्बा नइबा सेमदा चोखो स्होबा मुला। तिग्दा भिसम ख्रीष्ट खाइमै नाश आतबा आत्माग्याम तिगै दोष आरेबा बलि

६:४ प्रस्था ३०:१-६; २५:१०-१६; १६:३३; गन्ती १७:८-१०; व्यव १०:३-५

६:५ प्रस्था २५:१८-२२ ६:६ गन्ती १८:२-६ ६:७ लेवी १६:२-३४

दोसी हाडसे हाडदान परमेश्वरदा फुल्जी।

१५ थेतबासेलमा परमेश्वरसे जुकजुकधोना चिबा मोलमगदे पिन्ना भिसी लबा कबुल हाडसे धम्बा म्हिगदेसे याङ्गै भिसी छार कबुल ढिक्का लबा चा ख्रीष्टनोन हिन्ना। तिग्दा भिसम डाच्छा लबा पुरानो कबुलला धुइरी म्हिगदेसे लबा पापगदेय्याम फेबाला लागिरीन ख्रीष्ट सिबा मुला।

१६ अर्गु ताम चा खालै म्हिसे हाडला सम्पत्ति बकसपत्र भिसी पिन्बा हड्बा हिन्ना, तिग्दा भिसम बकसपत्र लसी पिन्बा म्हि आसितेधोना थे बकसपत्रसे तिगै गे आल। १७ तिग्दा भिसम बकसपत्र भिसी पिन्बा म्हि सोतेधोना बकसपत्र याङ्बा म्हिला तिगै अधिकार आत। थे बकसपत्र भिसी पिन्बा म्हि सिमाहेन्से जे बकसपत्र याङ्बा म्हिला अधिकार तला। १८ थेतबासेलमा डाच्छा लबा पुरानो कबुलसेनोन का आरेतेधोना तिगै गे आलमुबा। १९ मोशासे परमेश्वरसे पिन्बा जम्मान ठिमगदे म्हिगदेदा पाङ्सी जिन्माहेन्से क्युइरी बोगोदेन बहरला का दोङ्सी हिसपला स्याउलादेन वाला ऊनसे म्हिगदेदेन परमेश्वरसे पिन्बा ठिमला किताबरी स्वामुबा।* २० ओच्छे थेसे चुहङ्ग भिसी भिजी, “एनीगदेसे परमेश्वरसे कुल्बा

ताम ड्यान्नौ भिसी थेसे एनीगदेदेन छ्याम लबा कबुलदा पक्का लबा चा चुनोन का हिन्ना।” २१ थेहङ्ग लसीन मोशासे परमेश्वरला मन्दिरला चोखो ग्लादेन पूजा लबारी चलब लबा जम्मान स्हेगदेरी थे का स्वाजी।* २२ पाङ्गनोन तोःमा परमेश्वरसे मोशादा पिन्बा ठिम अन्छार जम्मान हड्बा स्हेदा कासे चोखो तना लला, का बगब आततेधोना पापला दोष मेटब आत।

२३ थे डाच्छाला ठिमला तामगदे स्वर्गरी मुबा स्हेगदे हड्बा जे हिन्ना। थेहङ्ग स्हेगदेदा मी चोखो स्होबारी ठिम तोःजी भिसम स्वर्गरी मुबा स्हेगदेदा चोखो स्होबारी भन ज्यबा बलि लतोःला। २४ थेतबासेलमा ख्रीष्ट म्हिसे स्होबा चोखो ग्लारी आफेप्नी। तिग्दा भिसम थे स्वर्गरी मुबा चोखो सत्य ग्ला हड्बा जे हिन्ना। तर दान्दे थे परमेश्वरला डाच्छा यहाडला लागिरी ताम थान्बारी स्वर्गरी फेप्बा मुला। २५ डाच्छाला ठिम अन्छार परमेश्वरला मन्दिररी पूजा लबा मुल म्हि जन्तुला का भोर्सी दिङ्गदङ्गसेन चोखो ग्लारी नितोःबा मुबा। तर ख्रीष्ट चा हाङ्गनोन बलि दोसी घरिघरि स्वर्गरी आफेप्नी। २६ चुदे सदन फेप्तोःबा हिन्सम जम्बुलिङ्ग छ्यामाहेन्सेन ख्रीष्टसे घरिघरि दुख नातोःसेला मुबा। तर जम्बुलिङ्ग नाश

तबा धुइधोनाला लागिरी ख्रीष्ट तिरेम
 फेप्खसी सदनना लागिरी पापला
 दोष मेटब लबारी हाडनोन बलि तजी।
 २७ म्हि तिरेम सिनोन तोःला, ओच्छे
 सिमाहेन्से परमेश्वरसे थेला निसाफ
 लला। २८ थेहड् लसीन ल्हानान म्हिला
 पापला दोष मेटब लबाला लागिरी
 ख्रीष्टएनोन तिरेम जे बलि दोजी।
 ख्रीष्ट दोःसीनोन फेप्खला, ओच्छे
 थे धुइरी चा म्हिगदेला पापला दोष
 मेटब लबाला लागिरी आहिन, तर
 ताड्सी ताड्सी थेला ग्याम च्यासी
 चिबागदेदा थाना लबारी फेप्खला।

ख्रीष्ट सदनना लागिरी बलि तजी

१० परमेश्वरसे मोशादा
 पिन्बा ठिम चा लिच्छा
 खबा ज्यबा तामला चिनु जे हिन्ना।
 तर ख्रीष्टसे लबा ज्यबा तामनोन चा
 आहिन। तिग्दा भिसम डाच्छाला
 ठिम अन्छार दिडएदडसेन खाल
 गिकलान बलि फुल्मुबा। तर थे
 बलिसे चा परमेश्वर मुबा ग्लारी खबा
 म्हिगदेदा चोखो स्होबारी आखम।
 २ बलि फुल्सी म्हिगदे चोखो तबा
 हिन्सम बलि फुल्बान आख्लासेला
 मुबा। तिग्दा भिसम परमेश्वरदा
 तेन्बा म्हिगदे सदनना लागिरी चोखो
 तसेला मुबा। ओच्छे थेनीगदेसे पापी
 भिसी म्हन्आतोःसेला मुबा। ३ बरु थे
 दिडएदडसेन लबा बलिसे म्हिगदेदा

हाडला पाप सदन ढन्ना जे लला।
 ४ तिग्दा भिसम बहरदेन रा बोगोगदेला
 कासे खाइमै पापला दोष मेटब लबारी
 आखम।

५ थेतबासेलमा जम्बुलिडरी फेप्खबा
 धुइरी ख्रीष्टसे परमेश्वरदा चुहड्
 भिसी सुइजी,

“ हाडसे भेटीदेन बलिदान
 आम्हाइनी,

तर डाला लागिरी हाडसे ल्हुइ
 गिक स्होजी।

६ हाड मेरी खाड्सी फुल्बा बलिदेन
 पापला दोष मेटब तबाला
 लागिरी फुल्बा बलिगदेरीनोन
 आताइनी।* ”

७ जमाहेन्से डाइ चुहड् भिसी भिजी,
 “ स्हीगो परमेश्वर, डाला बारेरी
 बचनरी भिबा हड्नोन
 हाडसे म्हन्बा अन्छार पूरा
 लबारी डा खबा मुला। ”

८ ख्रीष्टसे डाच्छा चुहड् भिसी
 सुइजी, “ जन्तुगदेला बलिदेन अन्न
 बलिगदे ओच्छे बलि फुल्बा ग्लारी
 खाड्सी पिन्बा जन्तुला बलिदेन पाप
 मेटब तबाला लागिरी फुल्बा बलि
 किन्बारी हाड आताइनी। ” चु जम्मान
 बलिगदे चा मोशादा पिन्बा ठिम
 अन्छार मुसैनोन चुहड् भिसी सुइजी।
 ९ ओच्छे दोःसी ख्रीष्टसे चुहड् भिसी
 सुइजी, “ स्हीगो, हाडसे म्हन्बा ताम
 पूरा लबाला लागिरी डा खबा मुला। ”

लिच्छाला ठिमदा सदनना लागिरी
थान्बारी ख्रीष्टसे डाच्छाला ठिमदा
भ्याङ्जी। १० परमेश्वरसे म्हन्बा ताम
पूरा लबारी येशू ख्रीष्टसे हाडलान
ल्हुइ बलि फुल्जी। चुनोन बलिंग्याम
य्हाडदा सदनना लागिरी चोखो स्होबा
मुला।

११ परमेश्वरला मन्दिररी पूजा लबा
जम्मान म्हिगदेसे डाच्छाला ठिम
अन्छार सदन परमेश्वरला डाच्छा
निसी घरिघरि खाल गिकलान बलि
फुल्बा गे लमुला। तर थेहङ्बा
बलिसे खाइमै पापला दोष मेटब
आतमुला।* १२ तर ख्रीष्टसे मी
पापगदेला दोष सदनना लागिरी
मेटब लबारी हाडलान ल्हुइदा बलि
गिक स्होसी फुल्जी। ओच्छे थे
परमेश्वरला दाहिने छ्यापट्टि मुल
ठिरी धन्छ्याजी।* १३ परमेश्वरसे
थेला शत्रुगदेदा थेला काड धिरी
आथान्तेधोना थे थेरीन भ्रान्सी
धन्छ्याला। १४ तिगदा भिसम बलि
गिकग्यामसेन थेसे चोखो स्होबा
म्हिगदेदा सदनना लागिरी थेसे तिगै
दोष आरेबा स्होबा मुला।

१५ ओच्छे परमेश्वरला आत्मासेनोन
चुला बारेरी य्हाडदा चुहङ् लसी उन्बा
मुला,
१६ “परमप्रभुसे चुहङ् भिसी सुङ्बा
मुला,

लिच्छाला धिनरी थेनीगदेदेन
छ्याम लबा छार कबुल चुनोन
हिन्ना।

डाइ थेनीगदेला सेमरी डाला
ठिम भिसी थान्ना।”*

१७ दोःसी परमप्रभुसे चुहङ् भिसी
सुङ्बा मुला,

“दाहेन्से डाइ थेनीगदेसे लबा
पापदेन आज्यबा गेगदे खाइमै
आढन।”*

१८ दाहेन्से थेनीगदेला जम्मान पाप
माफ तबासे लमा दोःसी थेनीगदेला
पापला लागिरी तिगै बलि फुल्आतोः।

परमेश्वरला डाच्छापट्टि निउ

१९ थेतबासेलमा ज्योज्यो आले नाना
आडागदे, येशूला कासे लमा य्हाडसे
जम्मान भन्दा चोखो ग्लारी निबा आँट
याङ्बा मुला। २० येशूसे हाडला ल्हुइ
य्हाडला लागिरी बलि पिन्जी। ओच्छे
पर्दाग्याम जम्मान भन्दा चोखो ग्लारी
निबारी जुकजुकधोना सोबा छार ग्याम
ठोङ्सी पिन्बा मुला। २१ परमेश्वरला
दिमरी जम्मान अधिकार याङ्बा
परमेश्वरदा तेन्बा य्हाडला मुल म्हि
गिक मुला। २२ दाहेन्से य्हाड आज्यबा
म्हन्बा तामग्याम चोखो तबादेन चोखो
क्युइसे खुसी धाबा ल्हुइ थोसी ज्यबा
सेमदेन पूरा विश्वास लसी परमेश्वरला
डामरी निङ्।* २३ य्हाडसे लबा आशरी

य्हाड याडयोड आतना कोङ्सी चिड। तिग्दा भिसम हाडसे पिन्ना भिसी कबुल लबा परमेश्वर चा विश्वास लखम्बा परमेश्वर हिन्ना। ^{२४}य्हाडसे गिकसेम गिकदा माया लबादेन ज्यबा गे लबाला लागिरी आँट खबा खाल्ला ताम जे लइ। ^{२५}कोइ कोइ म्हिला संगतीरी आनिबा बानी मुला। तर य्हाड चा संगतीरी निबा आरुलागे। बरु प्रभु दोःसी फेप्खबा धिन खबारी छ्याइबा मुला भिबा ताम घोसी गिकसेम गिकदा भन आँट पिन्गे।

^{२६}तिग्दा भिसम सत्य ताम था याङ्सीनोन चुदे दोःसी पाप लबाला लबान लजी भिसम य्हाडसे लबा पापला दोष मेटब लबारी अर्गु खजिबै बलिदान आरे। ^{२७}तर थेहङ्बा पाप लबागदे चा परमेश्वरला शत्रुगदेदा नाश लबा ल्हानान घेन मेदेन परमेश्वरसे पिन्बा लोङ्बा खबा सजाय भ्रान्सी चितोःबा जे मुला। ^{*}^{२८}चुदे खालै म्हिसे परमेश्वरसे मोशादा पिन्बा ठिम आङ्यान्ना भ्रबा ताम म्हि न्ही सोमसे म्राङ्सी पाङ्जी भिसम थे ठिम आङ्यान्बा म्हिदा तिगै दया आउन्ना साइतोःबा मुबा। ^{*}^{२९}थेहङ् बाभिसम परमेश्वरला भादा बिरोध लबा म्हिसे भन गाते ल्हाना सजाय याङ्ला। तिग्दा भिसम थेसे हाडदा पापग्याम फेसी चोखो तना

लबादेन परमेश्वरसे लबा कबुलदा पूरा लबा स्त्रीष्टला कादा गे आखेलबा स्ते स्तेबा मुला, ओच्छे दयामाया पिन्बा परमेश्वरला आत्मादा बिरोध लबा मुला। ^{*}^{३०}तर चुहङ् भिसी सुङ्बा परमेश्वरदा य्हाडसे डोसेबा मुला, “बदला किन्बा गे डाला हिन्ना, डाइ थेनीगदेसे लबा गे अन्छारला सजाय पिन्ना”। ओच्छे दोःसी, “परमप्रभुसे हाडला म्हिगदेला ठीक निसाफ लला” भिसीएनोन सुङ्बा मुबा। ^{*}^{३१}पाप गे लबागदे छोन्बो परमेश्वरला छ्यारी परब तबा चा लोङ्बा खबा ताम हिन्ना।

^{३२}एनीगदेसे येशू स्त्रीष्टला बारेरी लोप्बा डाच्छाला धिनगदेदा थाम्लेःगो। जमा धुइरी एनीगदेसे ल्हानान दुख नातोःसै विश्वासरी कोङ्सी चिबा मुबा। ^{३३}खाइमाम एनीगदेसे जम्मान म्हिला ओन्छाडरी दुखदेन हेला नाजी। ओच्छे खाइमाम एनीगदेसे दुखरी परब तबागदेदा हो लजी। ^{३४}एनीगदेसे भ्याल्खानरी परब तबागदेदा हो लजी। ओच्छे हाडदेन छ्याम मुबा जम्मान धन सम्पत्ति ब्यन्माएनोन एनीगदेसे ताङ्सी ताङ्सी नाजी। तिग्दा भिसम जुकजुकधोना चिबा अभ घेन सम्पत्ति हाडदेन छ्याम मुला भिबा ताम एनीगदेदा था मुबा।

१०:२७ यशै २६:११ १०:२८ व्यव १७:६; १६:१५ १०:२९ प्रस्था २४:८

१०:३० व्यव ३२:३५-३६

३५ थेतबासेलमा एनीगदेसे विश्वास-
ग्याम जुन आँट याड्बा मुला थे
थारूलागो। चुग्यामसेन एनीगदेसे घेन
इनाम याड्ला। ३६ परमेश्वरदा सेम
निबा गे लबारीदेन परमेश्वरसे पिन्ना
भिसी कबुल लबा तामगदे याड्बाला
लागिरी भ्रान्सी चितोःबा मुला।
३७ तिगदा भिसम बचनरी चुहड् भिसी
भ्रिबा मुला,

“दाहेन्से फेप्खबा चा फेप्खनोन
खला,
थेसे घइना आल।*
३८ तर डाइ म्हन्बा अन्छार

भ्रबा डाला म्हिगदे चा
विश्वासग्याम सोला,
ओच्छे चुदे थेनीगदे न्हडला
खालैसे विश्वास लबा ख्लाजी
भिसम
थे म्राड्सी डा आताड्।”

३९ यहाड चा विश्वास लबा ख्लासी
नाश तबा म्हिगदे न्हडला आहिन, तर
विश्वास लसी थारबा याड्बा म्हिगदे
न्हडला हिन्ना।

विश्वास

११ विश्वास लबा चा आश
लबा ताम याड्ला भिसी
दुक्क तबादेन आम्राड्बा तामरी
पुरान भर लबा हिन्ना। २ तिगदा भिसम
थेनीगदेसे विश्वास लबासे लमान

ओन्माला म्हिगदेदा परमेश्वरसे
हाडला म्हि स्होजी।

३ परमेश्वरसे हाडला बचनग्यामसे
चु जम्बुलिड स्होजी भिबा ताम
विश्वासग्याम यहाडसे था याड्बा
मुला। थेहड् लसी यहाडला मीसे
आम्राड्बा स्हेगदेग्यामसेन म्राड्बा
स्हेगदे स्होजी।*

४ विश्वासग्यामसेन हाबिलसे
परमेश्वरदा कयिनसे भन्दा ज्यबा
बलि फुल्जी। विश्वासग्यामसेन
हाबिलदा परमेश्वरसे हाडदा सेम
निबा म्हि स्होजी। ओच्छे थेसे फुल्बा
बलि परमेश्वरदा सेम निजी। थे सिसी
निसैनोन थेला विश्वासग्याम थेसे अभ्र
यहाडदा ल्हानान ताम लोप्बान मुला।*

५ विश्वास लबासे लमान हनोक
आसिनी। तर थेदा छोन्बोन स्वर्गरी
भोर्जी। ओच्छे थेदा खालैसेन
आस्याप्नी। तिगदा भिसम परमेश्वरसे
थेदा थीसी भोर्बा मुबा। थेदा
परमेश्वरसे थीसी भोर्बा भन्दा
डाच्छा थेसे परमेश्वरदा ताड्ना
लबा ताम चुग्यामसेन था याड्बा
मुला।* ६ विश्वास आलना खालैसेन
परमेश्वरदा ताड्ना लबारी आखम।
तिगदा भिसम परमेश्वर मुबा ग्लारी
खबा म्हिसे परमेश्वर मुला भिबा
तामदेन थेदा म्हाइबा म्हिदा इनाम
पिन्ना भिसी विश्वास लतोःला।

७ विश्वासग्यामसेन नोआसे थानोन आरेबा लिच्छा तसेला आम्नाङ्बा तामला बारेरी परमेश्वरसे कुल्बा अन्छार थेसे घेन पानी जहाज गिक स्होजी। ओच्छे थे पानी जहाज न्हडरी थेसे हाडला म्हेमेगदेदा थान्सी जोगब लजी। चुहङ् लसी थेसे विश्वासग्यामसेन जम्बुलिङला म्हिगदेला दोष उन्जी। ओच्छे थे हाडला विश्वासग्याम परमेश्वरदा सेम निबा म्हि दोजी।*

८ विश्वास लबासे लमा अब्राहामसे परमेश्वरसे कुल्बा ताम ड्यान्जी। ओच्छे थेदा पिन्ना भिसी कबुल लबा यहुल्सारी परमेश्वरसे थेदा निउ भिसी कुल्जी। तर हाड खानडपट्टि निबान मुला भिबा था आरेसै थे हाडला यहुल्सा रूलासी निजी।* ६ विश्वास लबासे लमा अब्राहाम परमेश्वरसे पिन्ना भिसी कबुल लबा यहुल्सारी निसी विदेशी हङ् लसी पाल फ्रेङ्सी चिजी। थेहङ् लसीन परमेश्वरसे इसहाकदेन याकूबदाएनोन थे यहुल्सा पिन्ना भिसी कबुल लजी। ओच्छे थेनीगदेएनोन अब्राहाम हङ् लसीन चिजी।* १० तिगदा भिसम अब्राहामसे परमेश्वर हाडसेन म्हन्सी जुकजुकधोना चिबा जगथोरी स्होबा शहरदा भ्रान्सी चिबा मुबा।

११ विश्वासग्यामसेन दिङ निसी जिन्सैनोन अब्राहाम आबा दोजी। साराएनोन कोला आतबाधोनान खुइ दोसी जिन्बा मुबा। तसैनोन परमेश्वरसे पिन्ना भिसी लबा कबुलथोरी अब्राहामसे पूरान विश्वास लसी चिजी।* १२ अब्राहाम ल्हानान खेप्बा दोबासे लमा थेग्याम तिगै आशनोन आरेमुबा। तसैनोन थे म्हि गिकग्यामसेन मुला सारदेन समुन्द्रला बालुवा तेनोन भयानोन आखम्बा सन्तान तजी।*

१३ परमेश्वरसे पिन्ना भिसी कबुल लबा स्हेगदे आयाङ्सैनोन चु जम्मान म्हिगदेसे सिबा धुइधोनाएनोन विश्वास लबा आरूलानी। तसैनोन थेनीगदेसे थे स्हेगदेदा थारेङग्यामसेन म्नाङ्सी सेमरी किन्जी। ओच्छे थेनीगदेसे हाड चा चु जम्बुलिङरी विदेशीदेन परदेशी हिन्ना भिसी म्हन्जी।* १४ चुहङ्बा ताम लबा म्हिगदेसे हाडलान यहुल्सा म्हाइबान मुला भिबा ताम प्रस्टन घोना लमुला। १५ थेनीगदेसे डाच्छा हाडसे रूलासी खबा यहुल्सादा ढन्सी आचिनी। चुदे थे यहुल्सादा ढन्बा हिन्सम थेनीगदे दोःसी थे यहुल्सारी निम्याङ्सेला मुबा। १६ तर थेनीगदेसे चा चु भन्दान ज्यबा स्वर्गला यहुल्सा म्हाइबा मुबा।

११:७ उत्प ६:१३-२२ ११:८ उत्प १२:१-५ ११:९ उत्प ३५:२७

११:११ उत्प १८:११-१४; २१:२ ११:१२ उत्प १५:५; २२:१७; ३२:१२

११:१३ उत्प २३:४; १ इति १६:१५; भजन ३६:१२

थेतबासेलमा थेनीगदेला परमेश्वर हिन्ना भिसी सुङ्बारी परमेश्वर आपे:नी। तिगदा भिसम परमेश्वरसे थेनीगदेदा पिन्बाला लागिरी शहर गिक स्होसी जिन्बा मुबा।

१७-१८ परमेश्वरसे अब्राहामला सेम च्याबा धुइरी विश्वाससे लमान अब्राहामसे हाडला भा इसहाकदा[†] बलि फुल्बारी तयार तजी। परमेश्वरसे अब्राहामदा “इसहाकग्यामसेन एला वंश बढब तला” भिसी कबुल लबा मुबा। तसैनोन अब्राहामसे विश्वासग्यामसेन हाडला गिक जेन भादाएनोन बलि फुल्बारी तयार तजी।^{*} १६ तिगदा भिसम परमेश्वरसे सिबाग्यामएनोन सोना लखम्ला भिबा अब्राहामदा विश्वास मुबा। ओच्छे अब्राहामसे विश्वास लबा अन्छारनोन हाडला भा इसहाकदा सिबाग्याम सोबा हङ्बान दो:सी याङ्जी।

२० विश्वाससे लमान इसहाकसे याकूबदेन एसावदा लिच्छा तसेला तामला बारेरी मोलम पिन्जी।^{*}

२१ विश्वाससे लमान याकूबसे सिबारी छ्याइबा धुइरी योसेफला

भागदेदा मोलम पिन्जी। ओच्छे कडीला भररी राप्सी याकूबसे परमेश्वरला जयजयकार लजी।^{*}

२२ विश्वाससे लमान योसेफसे सिबा धुइरी इस्राएलीगदेसे मिश्र यहुल्सा रुलाबा तामला बारेरी पाङ्बा मुबा। थेसे थेनीगदेदा लिच्छा मिश्र यहुल्सा रुलाबा धुइरी हाडला नखुगदे तिग लतो:ला भिबा तामएनोन कुल्जी।^{*}

२३ विश्वाससे लमान मोशाला आबा आमासे थे न्हमाहेन्से ला सोमधोना छुम्सी थान्जी।[†] थेनीगदेसे हाडला भा ल्हानान जेबा म्राङ्जी, ओच्छे ग्लेसे कुल्बा ताम आङ्ग्यान्बारीनोन आलोङ्नी।^{*}

२४ विश्वाससे लमान मोशासे हाड घ्रेन तमाहेन्से फारो ग्लेला भामेला भा दोबारी आङ्ग्यान्नी।^{*} २५ पाप लसी छिन्नड ताङ्सी चिबा भन्दा मी बरु थेसे परमेश्वरला म्हिगदेदेन छ्यामनोन दुख नाबा सेम लजी। २६ मिश्र यहुल्साला जम्मान धन सम्पत्ति भन्दा बरु थेसे थार्बा पिन्बा ख्रीष्टला लागिरी दुख नाबा चा घ्रेन सम्पत्ति म्हन्जी। तिगदा भिसम थेसे परमेश्वरसे पिन्बा इनामदा च्यासी

११:१७ हागारपट्टिला भा मुसैनोन अब्राहामसे इसहाकदा गिक जेन भा भिसी भिबा मुबा। तिगदा भिसम इसहाक चा परमेश्वरसे कबुल लबा अन्छार न्हबा मुबा भिसम हागारपट्टिला भा चा अब्राहामला सेमसे म्हन्बा अन्छार न्हबा मुबा।

११:२३ मिश्र यहुल्साला ग्लेसे इस्राएलीगदेला भा न्हजी भिसम साइगो भिसी कुल्बा मुबा।

११:१७-१८ उत्प २२:१-१४ ११:२० उत्प २७:२७-२६, ३६-४०

११:२१ उत्प ४७:३१-४८; ४८:२० ११:२२ उत्प ५०:२४-२५; प्रस्था १३:१६

११:२३ प्रस्था १:२२; २:२ ११:२४ प्रस्था २:१०-१२

चिबा मुबा। ^{२७}विश्वाससे लमान ग्लेला बोमो म्राङ्सी आलोङ्गनान थेसे मिश्र यहुल्सा रुलाजी। ओच्छे म्राङ्आखम्बा परमेश्वरदाएनोन म्राङ्बा हङ् लसीन थे भङ्सी चिजी। * ^{२८}विश्वाससे लमान मोशासे नाश लबा स्वर्गदूतसे इस्राएलीगदेला थेबा भागदेदा थासाइगै भिसी बलिला का इस्राएलीगदे जम्मालान प्रापरी फोर्पुङ्जी। ओच्छे मिश्र यहुल्साग्याम फेसी खबा धिनदा ढन्सी धङ्बा चाड धङ्पुङ्जी। *

^{२९}विश्वाससे लमान इस्राएलीगदेसे सरी भ्रबा हङ् लसी वाला समुन्दरी भ्रसी क्याम्सडपट्टि निजी। मिश्र यहुल्साला म्हिगदेएनोन थेनीगदे हङ् लसीन निबारी छ्याइमा डुबब तसी सिजी। *

^{३०}विश्वाससे लमान इस्राएलीगदेसे निसरेधोना यरीहो शहरला पर्खाल क्युर्मा फुप्जी। * ^{३१}विश्वाससे लमान राहाब भिबा बेश्या म्रिडम्हेमे परमेश्वरसे कुल्बा ताम आङ्ग्यान्बा म्हिगदेदा साइबा धुइरी सोजी। तिगदा भिसम थेसे थेरी चिवा लबारी निबा इस्राएलीगदेदा मान लबा मुबा। *

^{३२}चु भन्दा ल्हाना डाइ तिग पाङ्से? तिगदा भिसम गिदोन, बाराक, शिमशोन, यिप्ता, दाऊददेन शमूएल ओच्छे स्थान्दो अगमवक्तागदेला बारेरी पाङ्बाला लागिरी डादा धुइ आरे। * ^{३३}विश्वाससे लमान थेनीगदेसे जम्मान यहुल्सागदेदा ढासी शासन लजी। थेनीगदेसे ठीक निसाफ लसी परमेश्वरसे पिन्ना भिसी कबुल लबा तामगदेएनोन याङ्जी। विश्वाससे लमान थेनीगदेसे च्यानगदेला सुङ् म्रुसी पिन्जी। * ^{३४}थेहङ् लसीन थेनीगदेसे मेला ल्हामदा साइजी, तरवारग्यामएनोन जोगब तजी। ओच्छे थेनीगदे कमजोर मुबा, तर भङ्बा तजी। थेनीगदे लडाइ लमा आलोङ्नी ओच्छे अर्गु यहुल्साला जम्मान शत्रुगदेदा भ्रेना लजी। * ^{३५}विश्वाससे लमान म्रिडम्हेमेगदेसे हाडला म्हिगदेदा सिबाग्याम दोःसी सोबा स्याप्जी। *

स्थान्दोगदेसे चा सिमाहेन्से अभ्र ज्यबा जुनी याङ्बाला लागिरी मिश्र यहुल्साग्याम फेबा सेम आलना ल्हानान दुख नाजी। ^{३६}कोइ कोइदा बेइज्जत लसी कोर्सासे तोजी, स्थान्दोगदेदा चा च्याल्दासे खीसी

११:२७ प्रस्था २:१५ ११:२८ प्रस्था १२:२१-३० ११:२९ प्रस्था १४:२१-३१
 ११:३० यहो ६:१२-२१ ११:३१ यहो २:१-२१; ६:२२-२५ ११:३२ न्याय ६:११-३२;
 ४:६-५:३१; ११:१-१२:७; १३:२-१६:३१; १ शमू १:१-२५:१; १ शमू १६:१-१ राजा २:११
 ११:३३ दानि ६:१-२७ ११:३४ दानि ३:१-३०
 ११:३५ १ राजा १७:१७-२४; २ राजा ४:२५-३७

भयाल्खानरी भाङ्जी। * ३५ म्हिगदेसे थेनीगदेदा युडबासे तोजी, आरासे कलेजी, तरवारसे ताम्जी। ओच्छे थेनीगदेसे रादेन ग्युला ढि क्वान्जी। थेनीगदे प्राडबो, स्थान्दोला हेला नाबान दुख नासी क्यारमार कोर्सी भ्रतो:जी। * ३८ चु आज्यबा जम्बुलिङ थेनीगदेला लागिरी गे खेलबाधोनाला आरेबा। थेनीगदे तोडतोडबा ग्लादेन गडगदे ओच्छे ऊगदेरी क्यारमार कोर्सी भ्रतो:जी।

३६ थेनीगदे जम्मासेन हाडसे लबा विश्वासला लागिरी ल्हानान मान याङ्जी। तर परमेश्वरसे पिन्ना भिसी कबुल लबा स्हेगदे चा आयाङ्नी। ४० तिगदा भिसम यहाडदेन छ्याम जे थेनीगदे तिगै दोष आरेबा म्हि दोगै भिसीन परमेश्वरसे यहाडला लागिरी डाच्छान ज्यबा स्हे स्होसी थान्बा मुबा।

परमेश्वरला तहरी चिउ

१२ यहाडला क्युर्सीन चुदे ल्हाना विश्वास लबा म्हिगदे मुबासे लमा यहाडदा ग्यामरी कोल्ना लबा ल्हानान स्हेगदेदेन यहाडदा सजिलोसे कोल्ना लबा पापगदेदा यहाडसे भ्याङ्गे। ओच्छे यहाड धोतो:बा ग्लाधोना आधोतेधोना ढुकक तसी भ्रइ। २ यहाडला विश्वास

शुरु लबादेन पूरा लबा येशूदा च्यासी भ्रइ। लिच्छा याङ्बा ताङ्बा तामला लागिरी थेसे बेइज्जत तसै तिगै वास्ता आलना कुसरी दुख नाजी। दान्दे थे परमेश्वरला दाहिने छ्यापट्टिला मुल ठिरी धन्छ्याबा मुला। * ३ एनीगदेदा सुर्दा आतबादेन सदन विश्वासरी चिबाला लागिरी पापीगदेसे बेइज्जत लमा नाबा येशूदा च्यागो।

४ एनीगदे पापला शक्तिगदेदेन छ्याम छेमा सिबाधोना मी तबा आरे। ५ परमेश्वरसे एनीगदेदा हाडला भागदेदा हङ् लसी बचनरी चुहङ् लसी अर्ती पिन्बा ताम म्ले:जी?

“डाला भा, परमप्रभुसे लबा तहरी भ्रउ।

ओच्छे थेसे बङ्मा दुख थाम्हन्गो।

६ तिगदा भिसम जुन म्हिदा परमप्रभुसे माया लला थेदा हाडला तहरी थान्मुला।

ओच्छे हाडलान कोलागदे भिसी म्हन्बा जम्मादान थेसे सजाय पिन्मुला।”*

७ एनीगदेसे नाबा सजाय चा आबाला तहरी चिबा हिन्ना भिसी म्हन्गो। एनीगदेसे नाबा सजायग्यामसे परमेश्वरसे एनीगदेदा हाडलान कोलागदेदा हङ् लसी व्यवहार लबा मुला भिबा ताम उन्बा मुला। हाडला

११:३६ १ राजा २२:२६-२७; २ इति १८:२५-२६; यर्मि २०:२; ३७:१५; ३८:६

११:३७ २ इति २४:२१ १२:२ भजन ११०:१ १२:५-६ अय्यूब ५:१७; हितो ३:११-१२

आबाग्याम तोबा ग्याङ्बा आनाबा कोलागदे खालै मुला? आरे। ८ चुदे जम्मान कोलागदेसे नाबा सजाय एनीगदेसे चा आनानी भिसम एनीगदे हाडलान आबाला कोलागदे आहिन, तर स्थहान्दोदेन छ्याम ब्रेल्सी न्हबा कोलागदे हिन्ना। ९ चु जे आहिन, यहाड म्हिला मी आबासे हाडला कोलागदेदा तहरी थान्मुला, ओच्छे कोलागदेसे आबादा मान लमुबा। थेतबासेलमा भन यहाडसे यहाडला आत्माला आबा परमेश्वरला तहरी चितोःला। थेहड लजी भिसम यहाडसे जुकजुकधोनाला जुनी याङ्ला।

१० यहाड म्हिला आबासे चा यहाडदा तिगै धिनना लागिरी थेन्से ठीक भिसी म्हन्बा अन्छार तहरी थान्मुला। तर परमेश्वर आबासे सदनना लागिरी यहाडदा ज्यबा तगै ओच्छे हाड हड्बान तिगै दोष आरेबा दोबाला लागिरी तहरी थान्मुला। ११ सजाय याङ्बा धुइरी यहाडदा सुख आहिन, तर ल्हाना दुख तमुला। तर यहाड तहरी चिसी पाको दोबागदे परमेश्वरदा सेम निबादेन ज्यबा बानीबेहोर मुबा म्हि दोला।

१२ थेतबासेलमा एनीगदेला घेबा यागदे थीगो। ओच्छे कमजोर काडगदे भड्बा तना लउ।* १३ एनीगदे सोजो ग्यामरी भ्रउ। जमाहेन्से कमजोर

म्हिगदे आहिल, तर थेनीगदे ज्यना लसी भ्रखम्ला।*

परमेश्वरदा थारुलागो भिसी पाङ्बा

१४ जम्मान म्हिगदेदेन छ्याम ढिक्सी चिबारीदेन परमेश्वरला डाच्छा तिगै दोष आरेबा म्हि दोबारी भड लउ। तिगदा भिसम परमेश्वरला डाच्छा तिगै दोष मुसम खालैसेन परमप्रभुदा म्हाङ्बारी आखम। १५ च्यागो, खालैनोन परमेश्वरला दयामाया आयाङ्बा म्हि थादोगै। आज्यबा सेमग्याम खालैदान छेबा बड्बा तना थालगै, ओच्छे ल्हानान म्हिदा न्होङ्ना थालगै। १६ खालैसेन आज्यबा बानीबेहोर थाथोगै। ओच्छे एसाव हड्बान परमेश्वरसे कुल्बा ताम आङ्यान्बा म्हि थादोगो। थेसे छाक गिक चबाला लागिरी थेबा भासे याङ्तोःबा अधिकारदान चूङ्जी।* १७ एनीगदेदा थानोन मुला, लिच्छा थेसे हाडला आबाग्याम मोलम किन्बारी म्हाइजी। ओच्छे क्रासी क्रासी हाडसे डाच्छा चूङ्बा अधिकार दोःसी किन्बारी म्हाइजी। तर थेसे आयाङ्नी। तिगदा भिसम थेसे हाडसे लबा आज्यबा गे रूलाबा मौकान आयाङ्नी।*

१८ एनीगदे इस्राएलीगदे हड् लसी थुर्बारी खम्बा सीनै भिबा गडरी

खबा आरे। थेरी मेला ल्हाम थोन्बा मुबा, म्लाड म्लाडबा खसुसे घप्बा मुबा, ओच्छे लाबालुडसर खबा मुबा।* १९इसाएलीगदेसे बिगुलला घेन काइदेन परमेश्वरसे सुड्बा बचनएनोन थे:बा मुबा। चुहड्बा काइ थे:माहेन्से थेनीगदेसे दाहेन्से दो:सी खाइमै थे:आतो:गै भिसी बिन्ती लबा मुबा। २०तिग्दा भिसम थेनीगदेदा “चुदे खजिबै जन्तुसे चु गड थुर्जी भिसैनोन थेदा युडबासे तोसी साइगो” भिसी कुल्बा ताम थेनीगदेसे नाबारी आखम्नी।* २१मोशाएनोन थे ताम म्राड्सी ल्हानान लोड्बा मुबा। थेतबासेलमा, “डा लोड्सी फितफित धर्बा मुला” भिसी मोशासेनोन पाड्बा मुबा।*

२२तर एनीगदे मी सियोन गडरी खबा मुला। ओच्छे भयासीन भयाबारी आखम्बाधोनाला स्वर्गदूतगदे ताड्सी पोप तसी छोन्बो परमेश्वरला स्वर्गला यरूशलेम शहररी खबा मुला। २३एनीगदे स्वर्गरी मिन भिसी जिन्बा डाच्छा न्हबा परमेश्वरला कोलागदेला† सभारी खबा मुला। ओच्छे एनीगदे जम्मान म्हिला

निसाफ लबा परमेश्वर मुबा ग्लारीदेन परमेश्वरला डाच्छा ज्यबा म्हिगदेला आत्मा मुबा ग्लारीनोन खबा मुला। २४एनीगदे येशू मुबा ग्लारी खबा मुला। येशूसे चा एनीगदेदा परमेश्वरदेन छ्याम ढिक्ना लबाला लागिरी छार कबुल स्होबा मुला। ओच्छे एनीगदे हाबिलला कासे† भन्दा अभ ज्यबा ताम लोप्बा का स्वाबा ग्लारी खबा मुला।*

२५होशियार तसी चिउ, एनीगदेसे हाडदेन छ्याम ताम पाड्बा परमेश्वरला ताम ड्यान्बारी थारूलागो। तिग्दा भिसम चु जम्बुलिडला म्हि मोशासे कुल्बा ताम इसाएलीगदेसे आड्यान्मा सजायग्याम स्योरआम्याङ्नी। भन यहाडसे स्वर्ग्याम कुल्बा परमेश्वरला ताम आड्यान्नी भिसम यहाड खाहड् लसी स्योर्खम्ला? * २६परमेश्वरसे सीनै गडरी ताम लमा जम्बुलिडनोन य्होङ्जी। तर दान्दे परमेश्वरसे चुहड् भिसी कबुल लबा मुला, “दाहेन्से अभ तिरेम जम्बुलिड जे आहिन, तर डाइ स्वर्गन य्होङ्ना लला।” * २७चु “अभ तिरेम” भिबा तामग्याम जम्बुलिडरी मुबा जम्मान स्हेगदे नाश तला भिबा

१२:२३ “डाच्छा न्हबा परमेश्वरला कोलागदे” भिबा चा परमेश्वरदा डाच्छान विश्वास लबा म्हिगदे हिन्ना।

१२:२४ हाबिलला काग्याम सजाय याङ्जी भिसम येशूला काग्याम जम्मान म्हिसे पापला माफ याङ्जी (उत्प ४:११-१२ स्हीगो)।

१२:१८-१९ प्रस्था १९:१६-२२; २०:१८-२१; व्यव ४:११-१२; ५:२२-२७

१२:२० प्रस्था १९:१२-१३ १२:२१ व्यव ६:१६ १२:२४ उत्प ४:१०

१२:२५ प्रस्था २०:२२ १२:२६ हागै २:६

हिन्ना। चु भिबा चा आय्होड्बा स्हेगदे
चा नाश आत।

^{२८}थेतबासेलमा आय्होड्बा यहुल्सा
य्हाडसे याड्बासे लमा परमेश्वरदा
धन्यवाद पिन्गे। थेहड् लसीन
परमेश्वरदा सेम निबा गे लसी थेदा
सदन मान लबान जयजयकार लइ।

^{२९}तिगदा भिसम य्हाडला परमेश्वर
नाश लबा मे हड्बान मुला।*

परमेश्वरदा ताड्ना लबा गे

१३ गिकसेम गिकदा ज्योज्यो
आले नाना आडादा
हड्बानो सदन माया लउ। ^२डोआसेबा
डोन्बोगदेदा मान लबारी थारुलागो।
चुहड् लसी डोन्बोदा मान लमा कोइ
कोइसे था आयाड्ना स्वर्गदूतदाएनोन
मान लबा मुबा।* ^३हाडएनोन
भयाल्खानरी मुबा हड्बान म्हन्सी
भयाल्खानरी मुबागदेदा वास्ता लउ।
ओच्छे हाडलान लहुइरी दुख याड्बा
हड्बान म्हन्सी दुख याड्बागदेदाएनोन
वास्ता लउ।

^४ब्याह चा जम्मान म्हिला ओन्छाडरी
ज्यबा ततोःला। ओच्छे म्रिड हेम्बो
न्हडरी खाइमै आज्यबा तबारी आत।
तिगदा भिसम आज्यबा बानीबेहोर
थोसी स्थहान्दोला म्रिड हेम्बोदेन
छ्याम ब्रेल्सी भ्रवागदेदा परमेश्वरसे
सजाय पिन्ना।

^५एनीगदे धन सम्पत्तिला लिच्छा
थाभ्रउ, हाडदेन छ्याम जुन स्हे मुला
थेरीन ताड्सी चिउ। तिगदा भिसम
परमेश्वरसे चुहड् भिसी सुड्बा मुला,
“डाइ एदा तिगै लसीन आरुला,
डाइ एदा खाइमै थारेड
आथान।”*

^६थेतबासेलमा य्हाड दुक्क तसी
पाङ्गे,

“प्रभुसेन डादा हो लबा मुला,
थेतबासेलमा डा खाइमै
आलोड्।

तिग डादा म्हिसे तिगै लबारी
खम्ला? आखम।”*

^७एनीगदेदा परमेश्वरला बचनग्याम
लोप्बा मण्डलीदा च्याबा म्हिगदेदा
ढन्गो। थेनीगदेला गाते ज्यबा
बानीबेहोर मुबा थे घोउ। ओच्छे
एनीगदेसेनोन थेनीगदेसे लबा हड्बान
विश्वास लउ। ^८येशू ख्रीष्ट मी तिल्मा,
तिनी ओच्छे सदन गिकनोन मुला।
^९एनीगदेदा था आरेबा खजिबै छार
तामगदेसे एनीगदेदा सत्य तामग्याम
थाफेगै। चबा थुड्बाला ठिमसे
आहिन, तर परमेश्वरला दयामायासे
सेमदा भड्ना लबा चा ज्यबा हिन्ना।
चबा थुड्बाला ठिम अन्छार भ्रसी
आत्माला लागिरी तिगै फाइदा आरे।
^{१०}यहूदीगदेला चोखो ग्लारी
पूजा लबा म्हिगदेदा य्हाडला बलि

फुल्बा ग्लारी तिगै चबा अधिकार
आरे।[†] ११ डाच्छाला ठिम अन्छार
परमेश्वरला मन्दिररी पूजा लबा मुल
म्हिसे पापला लागिरी बलि फुल्बा
जन्तुला का पाल न्हडला जम्मान
भन्दा चोखो ग्लारी भोर्सी निमुबा।
तर थे जन्तु चा शहरग्याम मङ्ग्यार
भोर्सी खाङ्मुला।^{*} १२ थेतबासेलमा
येशूसेनोन ह्वाडलान काग्याम म्हिगदेदा
पापग्याम फेसी चोखो स्होबाला
लागिरी शहरला मङ्ग्यार निसी
सिजी। १३ थेतबासेलमा य्हाडएनोन
शहरला मङ्ग्यार येशू मुबा ग्लारी
निसी थेसे नाबा ह्ङ्बान बेइज्जत
नागे। १४ तिग्दा भिसम चु जम्बुलिङरी
सदन चिबाला लागिरी य्हाडला शहर
आरे। तर य्हाडसे मी लिच्छा खबा
शहरला ग्याम च्यासी चिबा मुला।

१५ थेतबासेलमा य्हाडसे येशूग्याम
परमेश्वरदा सदन जयजयकारला बलि
फुल्गे। चु थेला मिन किन्बागदेला
सुङ्ग्याम फुल्बा बलि हिन्ना।
१६ गिकसेम गिकदा ज्यबा लबारीदेन
हो लबारी थारुलागो। तिग्दा भिसम
परमेश्वरदा सेम निबा बलि चुनोन
हिन्ना।

१७ एनीगदेसे ह्वाडला मण्डलीदा
च्याबा म्हिगदेसे कुल्बा ताम ड्यान्सी

थेनीगदेला तहरी चिउ। थेनीगदेला गे
चा एनीगदेला आत्मादा वास्ता लबा
हिन्ना। ओच्छे थेनीगदेसे एनीगदेला
लागिरी लबा गेला हिसाब परमेश्वरदा
उन्तोःला। एनीगदेसे थेनीगदेला ताम
ड्यान्जी भिसी थेनीगदेसे ताङ्सी
ताङ्सी ह्वाडला गे लला। तर थेहङ्
आलसम थेनीगदेसे दुख ड्हम्ला,
ओच्छे एनीगदेला लागिरी तिगै ज्यबा
आत।

१८ डन्ना लागिरी सदन प्रार्थना लउ।
डन्से म्हन्बा अन्छार डन्से तिगै गल्ती
लबा आरे भिबा ताम डन्दा पक्का
मुला। तिग्दा भिसम सदन ज्यबा गे
लबा डन्ना सेम मुला। १९ डा दोःसी
एनीगदे मुबा ग्लारी योनान खखम्मौ
भिसी एनीगदेसे डाला लागिरी प्रार्थना
लसी पिन्गो भिबा डाला बिन्ती मुला।

प्रार्थना

२० शान्तिला परमेश्वरसे जम्मान
ग्युगदेला मुल गोठालो य्हाडला
प्रभु येशूदा सिबाग्याम सोना लजी।
ओच्छे थेला काग्याम जुकजुकधोना
चिबा कबुल पूरा लजी। २१ एनीगदेसे
परमेश्वरसे म्हन्बा गे लबाला लागिरी
प्रभु येशूग्याम एनीगदेदा जम्मान ज्यबा
तामगदेसे प्लिङ्ना लगै। ओच्छे

१३:१० तिग्दा भिसम थेनीगदेसे डाच्छाला ठिम अन्छार पूजा लबा तामथोरी भर लमुबा।
ओच्छे थेनीगदेसे प्रभु येशूथोरी चा भर आलमुबा। य्हाडला लागिरी बलि फुल्बा ग्ला चा
येशूला कुस हिन्ना।

१३:११ लेवी १६:२७

परमेश्वरदा सेम निबा गेगदे लबारी
खम्मौ भिसी येशू ख्रीष्टग्याम एनीगदेला
सेमरी गे लगै। येशू ख्रीष्टला सदन
मानदेन जयजयकार तगै। आमेन।

२२ ज्योज्यो आले नाना आडागदे,
एनीगदेदा डाला चु बिन्ती मुला,
एनीगदेदा आँट पिन्बा चु ताम आछेर्ना
इयान्गो। डाइ एनीगदेदा ल्हाना
ताम भ्रिबा आरे। २३ यह्हाडला आले
तिमोथीएनोन भयाल्खानग्याम थोन्सी

जिन्बा मुला भिबा ताम डाइ एनीगदेदा
पाङ्ला। थे योनान खजी भिसम डा
थेदेन छ्यामनोन एनीगदे मुबा ग्लारी
खला। २४ एनीगदेला जम्मान मण्डलीदा
च्याबा म्हिगदेदेन परमेश्वरला जम्मान
म्हिगदेदा फ्याफुल्ला। इटालिया
यहुल्साला विश्वासीगदेसेनोन एनी-
गदेदा फ्याफुल्ला भिसी पाङ्बा
मुला। २५ एनीगदे जम्मानदेन छ्याम
परमेश्वरला दयामाया तगै। आमेन।